


BULOBA BÙDI KÀBÌDÌ

MUNKACÌ MWÀ KUDÌSHÌNDA

 Amen. Mukalenge ànùbènèshè. Nudi mwà kusòmbaayi. Byùmvwika bímpè bikolè bwà kulwa dilòòlò edi nè kunùmvwa nutùmbisha Mukalenge, kwalukila cyàkàbìdì kumbèlu nè kumòna muntu yònsò. Mvwa mwindile cyòci eci kacya ànu ku Disàkidila dishààle pàmvwà mwab'ewu apu, bwà kwalukila cyàkàbìdì ku tabernacle wanyì. [Disangisha didi dyàmba nè: “Amen.”—Muf.] Ncyèna mumanyè kwàiyè to. Nyèyè ewu lwà apa. Ndi ànu ndikonka ní ùcívwa ànu mwà kutwà “amen” ku cyòci aci, nudi bamanyè's. [Mwanèètù Moore ùdi wàmba nè: “Amen.”] Bidi misangu yònsò ànu bímpè bwà kwikala kaaba aka. Nè mvwa mwindile, bu mungàmbì, kwambwila ànu ku Disàkidila dishààle.

² Tudi bafùme ku dishiya Cimenga cyà New York, mutùvwà benze kàpanyè kalenga kàà dikèma. Mukalenge mmutùbènèshe kuntwaku mu mùshindù wà makàndà. Nènkù tuvwa tusanganyibwa ku Morris Auditorium, nè misumbà yà bantu bapàtemù patapata, kuulu nè kwìnshì kwà misèèsù. Nènkù bàvwa mwà kwimana pambèlu apu, bindile. Bu—bu muntu mwà kulwa, ànu mubandidi, nudi bamanyè's, nè mufwànyine kwela meeji, èè, cintu kampànda's; bàmwè bantu, nudi bamanyè's, bàyaaya mu èkèleeziyà, nè pashìishe katanci aka, pàdi cintu kampànda cyàmbiibwa, cidìbo kabàyi baswè to, nebàjuuke bàkwàta njila bapàtuka. Nènkù bàvwa pambèlu apu beèla tukàndà twà masungulangana nè, nganyi uvwa mwà kwangata nkwasà awu dìbà divwabo bapàtuka. Nènkù mvwa mpicilakù dilòòlò dyònsò, nè mu bule bwà too nè ku misèèsù yisàtù, nènkù bàvwa mwà kwikala bapàte kuulu nè kwìnshì kwà misèèsù. Kàdi's Mukalenge ùvwa mutùbènèshe bulelèlè nè mutùpèèshe misùukà, nè dyondopiibwa dyà masààmà manène àbùngì divwa dyenzèke.

³ Nè pashìishe ku didyà dyà dindà dyà Beena Kantu-ku-byanza, tuvwa bapicile mu cikondo cyà dicyònkomoka, kusumbishabo tikè yàbò kumana. Nè—nè pashìishe mémè kudyàmbidila nè bàvwa nè cyà kubweja nkàmà, yà bàvwà kabàyi nè tikè to. Dìbà adi kuujabò tujila, nè munda mwà cibambalu mwònsò nè biibi, nè bikwàbò. Nènkù tudi bapicile ànu mu cikondo cyà dicyònkomoka cilenga be. Nsaserdòsè wa ba-Épiscopaliens nè bikwàbò byònsò kuntwaku, nè Mukalenge mmutùbènèshe bikolè menemene.

⁴ Ke pashìishe twètù kwimanyikila kumbèlu, kwànyi kumbèlu

kukwàbò, mu Jeffersonville. Mu bushùwà bwà bwalu, ndi musòmbèle mpindyewu mu Tucson, mu Arizona, munùdi bamanyè amu, munda mwà bidimu bìbidì bishààle ebi.

⁵ Nènku mpindyewu ndi mu njila wa dyalukila ku Tucson mpindyewu, bwà didyà dyà dindà dyà Beena Kantu-ku-byanza lumingu lùlwalwà elu ku Phoenix. Mwaba awu, dyàkàmwè paanyimà pàà ditùkù dyà kumpàlà dyà cidimu, tudi tubanga kàmpanyè kuntwaku, ndambù wa matùkù mukèsè kumpàlà kwà Beena Kantu-ku-byanza bàà Buloba bujimà, ngèèla meeji, anyi mpungilu wa ditùnga dijimà ku—ku Ramada Inn.

⁶ Nènku mbìmpè be bwà kwikala kaaba aka mu—mu cimenga cilenga cyà Shreveport eci, dilòlò edì.

⁷ Mpindyewu, pa ciibidilu ntu ngàakula ntàntà mule. Kàdi nènてete nè mwànyì mwònsò bwà kucikèèpeshakù, munda mwà mèbà àsàtù anyi ànaayi, nànsha bìshi, bwà eci nè bwà eci cikondo. Nènku ndi mumanyè nè ntu ànu nnùcyòkesha, kàdi, nwamònu's, nciitu mpeta mùshindù wà kunùmòna misangu yàbùngì to. Nè bààbùngì bàtu bàya Kumbèlu kumpàlà kwà mémè. . . bààlukila Kumbèlu mu Butùmbi kumpàlà kwà mémè kufika ku dinùmòna cyàkàbìdì, ke mémè kudyàmbidila nè: “Èè, eci neciikale muyiiki wètù wà ndekeelu pa buloba pàmwè kumpàlà kwà nwènù kubuuka kuya.” Nè bààbùngì bàkaadi bayè, kakùyì mpatà to, kwambwila ànu ku cikondo eci cidimu cishààle eci. Nè pàmwàpa, bu Mukalenge mwà kunènga, nè tupeta mpùngà wa kwalukila cyàkàbìdì cidimu cidi cilondà anyi musangu kampàndà, nekwikalè bakwàbò kàbìdì, kaaba aka dilòlò edì, pàmwàpa mémè mwinè. Katwèna bamanyè nè ndìbà kaayi ditùdì nè cyà kubiikidiibwa to. Nènku, nudi bamanyè's, Mukalenge Yesù mmufwànyine mene kulwa kumpàlà kwà masangisha aa kujikawù dilòlò edì.

⁸ Mpindyewu, bu munùdi bammanyè mémè, mémè nciitu mwakudi wa mpàci to, ncyèna mwakudi nànsha. Mémè—mémè ndi ànu munangè Mukalenge nè ngenza cìndi mwà kwenza bwà butùmbi Bwèndè. Nènku pàndì mwimàne kaaba aka pa cibùmbà cyà ku cyambilu eci apa, mumanyè nè muntu bu mùdì Mwanèètù Moore nè bantu banène bààbùngì mmwimàne pa cibùmbà cyà ku cyambilu eci, bìdì bìmfikisha ku didyùmvwakù bu—bu. . . kî nciyì mu mwaba wànyì to, kî ng'aci cìndi muswè kwamba to. Kàdi, ndi nswa kwamba nè, wànyì mwakulu nè bikwàbò, ndi ndyùmvwa bu nè, bu nè bantu kabàvwa bannange bìmpè menemene to, nùnkù's mbajuuke bakwàte njila baye pàmvwà mubànde mu cyambilu apu. Pa nànkù bàdi ànu bàntwàla, nè mémè ndi nè kusàkidila bwà bwalu abu. Mpindyewu. . .

⁹ Kàdi ntu misangu yònsò ànu ndwa nè—nè kiipàcìlà aka. Ncyèna ndwa kaaba aka ànu bwà kummònabo to; bu byòbì nànkù, mvwa kuya kwènù kumbèlu bwà kunùkumbula, nwamònu's. Ndi ndwa mwab'ewu bwà kwenza nè mwànyì pàànyì

mwônsò mûndi naamù bwà Mukalenge Yesù Kilistò, pândi mwab'ewu apa. Ncyèna mwaba ewu bwà kiipàcilà kakwàbò to ànu bwà kuMukwàcila mudimu, nè ku dyànyì pàànyì dimanya, nè bwà kunùtwàdila Díyì ànu mùdiDi dimpèèsha amu, kusambidila babèèdi bèènù nè beena ntàtu. Mpindyewu, netwikalè nè dilòòlò dimwè, anyì àbìdi, Mwanèètù Moore nè mèmè netùsangilè pàmwè, bwà twamònakù mwà kusambidila babèèdi.

¹⁰ Dìbà adi, dilòòlò dyònsò, tudi baswè bwà muntu yònsò udi kàyì mwena Kilistò awu, tutèkemena nè cintu kampàndà necyàmbiibwè anyì cyènjiibwè, bwà wamòna mwà kulwa mwena Kilistò. Nènku pawikala kùyì nànkù to, pawikala mumanè kwitabuuja Mukalenge Yesù Kilistò, nè muMwitàbe nè mubàtìiijibwe, kàdi kùyì mwanji kupeta Nyumà Mwimpè to, kùpicishikù eci to. Lekèlaku ànu eci cìikale dyèbè dilòòlò. Bwalu, vùlukàayi nè, nekwikalè ànu mènà búngì cyanààna mu Mukàndà awu. Kàdi pàdi dìnà dyà ndekeelu dīsàkidiibwa, ke cyònsò cìdiku aci. Nènku dyèbè wèwè's ndifwànyine kuWùkumbaja's.

¹¹ Pàakalwà Mwànà wa mùkòòkò nè kwangata Mukàndà mu cyanza cyà dyàbalumè cyà Ewu uvwa musòmbe pa Nkwasa wa butùmbi awu, ùvwa ùvwa m'Mukàndà wà Bupikudi. Nè mènà àvwà mafundamù kumpàlà kwà difùkà dyà dyulu nè buloba awu. Pàakabiikidiibwà dìnà dyà ndekeelu adi, Mukàndà awu, ndongamu awu, bikwàbò byònsò byàkabuuludiibwa musangu awu, Bitampì Mwandamutekète byàkabuuludiibwa kùdi Mwànà wa mùkòòkò. Maalu masokoka à Bible mujimà nkòong àvwa masokoka munda Amu. Bu twètù nè dìbà, mvwa muswè. . .

¹² Ndi mfùma ku dijikija Bitampì Mwandamutekète abi, ànu àbìdi àdi panshi aa. Ndi muswè kwibikenketa cyàkàbìdi. Kàdi ànu mùshindù mwinè wàkatùbèneshà Mukalenge's wè! Bààbúngì bàà kunùdi bàkaadikù bumvwè bwalu abu, nè babalè mu cikàndàkàndà cyà *Life*, nè bikwàbò, bintu bìvwà byenzèke munda mwà ciinè cikondo aci. Kàbìdi, pàakakwàtàbò fòtò, nànsha mene, wa Banjèlò mwandamutekète abu, mùvwàbi bidyànjila kwamba patwàkayà ku Wesètè apu. Ke kungambilaYe, ngondo yisàtù kumpàlà, mwaba ùvwàci mwà kwikala nè mùshindù wùmvwà mwà kwikala mwimàne mwaba awu, kàdi's ke cyòci aci's! Nè—nè byamù byà fòtò, kaa, ntàntà wa nkàmà yà kilòmèètà, mbicikwàte fòtò ànu mwaba awu mene, ànu menemene. Bìvwa bidyànjila kwamba ànu mu byòbi menemene! Nènku piikalàbi nè nkààtukù muiyishè cintu cyà cisonsola, mu nsòmbelu wanyì, m'Bitampì Mwandamutekète. Nè pa nànkù ndi mumanyè nè tukàadi ku cikondo cyà nshìikidilu.

¹³ Nènku dìnà dyà ndekeelu didi diya mu Mukàndà awu, anyì, dìnà dyà ndekeelu didi dipikùdiibwe adi, dyàkafùndiibwà mu Mukàndà awu adi, aci's ncikòse bwalu, Udi ùlwa bwà kunana cidìYe mupikùle. Nè ncifwànyine kwikala cikondo cyà

pabwàci. Nukààdikù bakwèlèlè meeji nè: bantu nebàtùngunuke ànu nè kuyiisha, èkèleeziyà neàtùngunuke ànu nè kwela meeji nè bàdi munkaci mwà kupeta bantu basùngidìibwe. Dìbà dikaadi dimane kupita pa dîbà adi, kwònsò nkumanè kujika, nwamònu's, nè Mukenji newuye too nè kùdì bàdì bajimine ànu menemene; ànu mwàkenzàbi mu matùkù à Noà, matùkù mwandamutekète mu bwàtù. Cyàkenzeka mu matùkù à Sodomà. Yesù Yèyè mwinè, citùpà Cyèndè—Cyèndè ciisàtù cyà mudimu Wèndè wà bwambi, Wàkaya kayiisha misùukà yìvwà mijìmine Cyèndèlèlè ayi, yìvwà mu bùlokò, yìvwà kayiyi minyingàlale to, mu lutùulù lwà mu matùkù à Noà. Kàdi katwèna bamanyè nè ndìbà kaayi didi bintu ebi bifwànyine kwenzeka to.

14 Kàdi twikalàayi badimwìjiiibwe. Lekèlaayi kujèmbelèla, twènzàayikù cintu kampàndà pa bwalu abu. Twètù katùyì bakùmbànàngàne nè Nzambi to, tùditéèkaayi ànu mu bulongàme nè Nzambi.

15 Musangu kampàndà, ngèèla meeji nè, mu nshapità wa 11 wa Maatàayi, ngèèla meeji nè mmùdibi, lwà ku mvensà mwí6, anyi cintu kampàndà, ncyèna mutwìshiiibwe to. Nnshapità wa 11, bwà aci ndi mutwìshiiibwe ànu menemene. Bayiidi bàà Yone bàakatùmiibwa kùdì Yone, musangu kampàndà, bwà kumòna Mukalenge Yesù, bwà kuMukonka ní Ûvwa Yèyè awu menemene, anyi ní bìvwa bikèngela bwà kukèbabò mukwàbò. Yèyè nè: “Ndàayi nùkaleejè Yone bintu bìdì byènzeka ebi. Nùmwbabilè nè: ‘Wa disànka ng’ewu udi kàyi ùlendwishiibwa munda Mwànyi to.’”

16 Nènku dîbà adi pàakasambukàbo kakùnà, nè Yesù pàmwàpa wàkabàtàngila, kwambaYè nè: “Nuvwa bapàtuke bwà kuya kamòna cinyi?” Ke bôbò... Yèyè nè: “Nuvwa bayè kamòna muntu kampàndà muvwàle bilàmbà bìmpè anyi?” Yèyè nè: “Abu bàtu mu nzubu ya bukalenge yà bamfùmù. Kàdi dilèngè dinyùkusha kùdì lupeepèlè anyi?” Yèyè nè: “Nuvwa bayè kamòna mupròfetà anyi?” Yèyè nè: “Ndi nnwàmbila nè, mutàmbe mene nè mupròfetà. Bu nwènu mwà kucyàkidila, yèyè ewu ke wàkamba mupròfetà, Maalàki 3 nè: ‘Nè Mémè nèntumè mùsànjeelà Wanyì kumpàlà Kwànyi.’”

17 Bayiidi bààkeela lukonko alu musangu kampàndà. Bàakamba nè: “Bwà cinyi bafùndì bàdi bàmba, balongeshi bàà Mifùndu, nè: ‘Eliyà ùdì nè cyà kwanji kulwa dyàmbedi kumpàlà kwà byòbì ebi, bintu byònsò ebi kwenzekabi?’” Mpindyewu vùlukàayi nè, Yèyè ùvwa ùyiikila nè bayiidi, kí mnè Báfàalèsà to. Bayiidi, bàakamba nè: “Bwà cinyi bafùndì bàdi bàmba nè: ‘Eliyà ùdì nè cyà kulwa dyàmbedi?’”

18 Yèyè nè: “Eliyà ùkaadi mumanè kulwa, nè bôbò bàakamwenzela cìvwàbo balongòlòle aci, kàdi nwènu kanùvwa bacimanyè to.”

¹⁹ Ambààyibì tǔng bu nwénù mwà kujandula dǐngà ditùkù, bu twétù bakafika ku cipungu cyà dikènga dinène anyi cintu kampàndà, wèwè kwamba nè: “Èè, pàànyì’s mvwa ngèèla meeji nè Dyambwibwa divwa nè cyà kulwa dyàmbedi?” Nwamònu anyi? Nènku díyi divwa mwà kwalukila nè kukwambila nè: “Dyambwibwa dikaadi dimanè kwenzeka, kàdi wèwè kùvwa mucimanyè to.”

²⁰ “Ànu mwàkadibi mu matùkù à Noà, mwàkasùngidiibwà misùùkà mwandamukùlù ku màyi amu, ke mwìkalàbi kàbìdì ku Dilwa dyà Mwànà wa muntu.” Bantu bàdi ànu bàtùngunuka, bèèla ànu meeji nè bàdi bènza ànu cintu cidì cijaalàme, piinè apu kwònsò kumanè kujika. Éyi Nzambi wa yààya, ikàlàku neetù luse’s! Twǎnjààyi, twǎnjààyi kukenketa, mpindyewu mene mu malòòlò makesè àdi àlondà aa, tumòne mwaba wutùdi tusanganyibwa.

Twìnyikààyi cyàkàbìdì mitù yètù.

²¹ Mukalenge Yesù, nè bintu ebi mu meeji, nè bileejìibwe kùdi èkèleeziyà ewu, bileejìibwe kùdi bantu aba; Nzambi, ndi ndòmba bwà Wàsùngilakù musùùkà wònsò mu Shreveport, musangu ewu, ùdi mufùnda mu Mukàndà awu. Kwòkò kwikàle bàmwè mwab’ewu bàdi kabàyi basùngidiibwe to, Taatù, swàkù bwà edi diikale díbà dìdìbo basùngidiibwe. Kwòkò muntu mu disangisha edi, dilòòlò edi, swàkù bwà edi diikalè dilòòlò dyèndè.

²² Bèneshà Mwanèètù wa balùme Moore, Mwanèètù wa bakàjì Moore, nè díkù dyàbò, bânà bààbò balela, bânà bàà bânà bààbò balela. Nzambi, tudì ànu tuKusàkidila bwàbò bòbò. Nè Mwanèètù Lyle, Mwanèètù Brown nè bânà bèètù bònsò bàà—bàà mu èkèleeziyà emu abu, Mwanèètù Don, nè musùmbà mulenga wà bantu ewu, bidimba byònsò mwab’ewu, beena kwitabuuja, tudì ànu tuKusàkidila bwà bwalu bwàbò.

²³ Nènku tudì tulòmba, Taatù wa mu Dyulu, bwà disangisha dyètù pàmwè kaaba aka ku Disàkidila edi... Ncifwànyine kwikala Disàkidila dyà ndekeelu ditwikalàku mwà kutwìlangana pàmwè pa buloba ebu, pa nàнку, Nzambi, túbwelelakù ku mpùnga ewu nè tùlaminyine díbà. Nènku tudì bamanyè nè díbà dikaadi—dikaadi dyènda diya bikolè, nè tudì baswè bwà byònsò bitùdiku mwà kwenza abi, bidì mu bukolè bwètù, bwà kwenza mudimu bwà Mukalenge Yesù kumpàlà kwà kulwaYè. Mu mùshindù kampàndà, ndi ndyùmva ànu bu nè Yèyè mmutwindile bwà—bwà kujikija mudimu awu. Pa nàнку, tùkwàcìshèku, Mukalenge, dilòòlò edi, bu muntu-nkààya, yònsò wa kutùdi, bwà twafwànyina kutàmba kucyùka bwalu bwà bakwàbò, bwà twàya mu mìsèèsù, anyi mu beena mutumba, nè— nè kubweja bajìmine, bwà bààfwànyina kwikala basùngidiibwe.

²⁴ Bèneshaku Díyi Dyèbè. Díyi Dyèbè didi Bulelèlè, Mukalenge, Bulelèlè bwònsò. Pa nàнку tudì tulòmba, bwà nè patùdi tuteeta kudyènzeja bwà kucibula Dyàmpà dyà Mwoyi

edi apa, Bulelèlà, kùdì bantu, bwà Nyumà Mwímpè àlwekù, bwà mubidi mucibùdiibwe ku Kàlvaryò awu kùvwa mpèkaatù nè cyà kuwùcibula, nè kuDyàbanya munkaci mwètù cyàkàbìdì, mu bwobùmwè banyùngùlùkile Dìyì. Bwalu tudi tulòmba nùнку mu Dìnà dyà Yesù. Amen.

²⁵ Mpindyewu, bu nwènù mwà kuswà, ndi muswè bwà nùbuululèku pàmwè naanyi. Bààbùngì bàà ku nwènù mbaswèku ànu bwà kulama Mifundu mwaba wùdì—wùdì mwambi ùbala, anyi mutangadiki. Nènku ndi muswè kubalakù ndambù, dilòòlò edi, mu Dutèlònòmà amu, nshapità mwi⁴, kubangila ku mvensà wa 7 too nè ku wa 14. Nènku Mukàndà wà Ebèlù, nshapità wa 14, mvensà wa 25 too nè ku wa 29, mukùmbajilakù. Dutèlònòmà 4.

Bwalu nditùnga kaayi didiku ditàmbe bunène, didi nè Nzambi mutàmbe kwikala pabwìpì naabò, bu mùdì MUKALENGE Nzambi wetù mu bintu byònsò bitùdì tumusòka abi?

Nènku nditùnga kaayi didiku ditàmbe bunène, didi diikale nè mèyi nè mìkandu nè bilumbulwidi byakàne bikolè bu mùdì mikenji yònsò eyi, yìndì ntèeka kumpalà kwènù leelù ewu eyi?

Wàdimuka wèwè mwine, nè ùlamè musùukà wèbè nè ntèmà yònsò, bwà kùpù mwoyi bintu bìdì mèsù èbè mamòne to, nè bwà kabyùmuku mu mwoyi wèbè matùkù ónsò à mwoyi to: kàdi bilongèshe bânà bèèbè, nè bânà bàà bânà bèèbè;

Nangànangà ditùkù diwàkiimana kumpalà kwà MUKALENGE Nzambi wèbè mu—mu Holèbà, pààkangambilà MUKALENGE nè: Nsangishile cisàmbà pàmwè, nènku nèmbàfikìshe ku dyumvwa mèyi àanyi, bwà bàayiila bwà kuncìina mu matùkù ónsò ìkalàbo nè mwoyi pa buloba, nè bwà bààmòna mwà kulongesha bânà bààbò balela.

Nè nwènù kuseemena pabwìpì nè kwimana muwìnshi mwà mukùnà; nè mukùnà wùlùkuka kapyà munkaci mwà dyulu, nè mìdimà, nè mavuba, nè mupimbu, nè mìdimà.

Nènku MUKALENGE kwakula neenù munkaci mwà kapyà: nwènù kutèèleja dìyì dyà mèyi Èndè, kàdi kanwàkamòna difwànangana nànsha òmwè to; nwakatèèleja ànu dìyì adi.

Kàdi yèyè wàkanwàmbila cipungidi cyèndè, cyàkanùtùminàye dìyì bwà nwènù kwenza aci, nànsha mene mèyi matùma dikùmi; nè wàkaàfùnda pa bipese bibìdì byà mabwe.

Nènku MUKALENGE wàkantùmìna dìyì pa dìbà adi bwà kunulongesha mèyì nè mikàndu nè bilumbulwidi, bwà nwàfwànyìna kubyènza mu buloba munùdì nuya bwà kubùpyàna.

²⁶ Nènku mpindyewu mu Mukàndà wà Ebèlù, nshapità wa 14, kubangila ku mvensà wa 25.

Nwàdìmuka bwà nwènù kanùbèngi ewu udi wakula awu to. Bwalu pùkalàbo kabàakapànduka bóbò bàakabènga ewu wakaakwila pa buloba awu, mmisangu búngì kaayì yitwàpangila kupànduka, twètù mwà kubènga ewu udi wakwila mu dyulu:

Mwena dìyì dyàkanyùkusha buloba musangu awu: kàdì's mpindyewu mmulayè, wàmba nè: Kàdì bwà musangu ewu kàbìdì mèmè nèngìikalè, ncyàkunyùkusha ànu buloba nkàáyabù to, kàdì nè dyulu kàbìdì.

Nènku mwàkù ewu, Musangu ewu kàbìdì. . . wùdì wùmvwija dyumusha dyà. . . bintu bìdì binyùkushìibwa, bu mùdì bintu bìdì byenjùbwe, bwà nè bintu bìdì kabìyì mwà kunyùkushìibwa byàmòna mwà kushààla. Kùdì. . .

Ki bwà cinyì tudi twakidila bukalenge bùdì kabùyì mwà kunyungishìibwa nànsha, twikalàayi nè ngàsà, kutùdì mwà kukwàcila Nzambì mudìmu bikùmbanangana nè kaneemu kàábúngì nè dicìina dyà difwànà dyà Nzambì:

Bwalu Nzambì wetù ùdì kapyà kàdì kwòsha kàshidisha.

²⁷ Mpindyewu ndi nè tuntu tufùnda ndambù kaaba aka, nè ndambù wa Mifùndu mifùnda mwab'ewu, yíndì muswè kwikala nteela mu tusana tukesè, mùndì mufwànyine kupèèsha eci mutù mukesè wà cyena-bwalu wà pabwàwù. Nè mikàbà yà mèyì eyi yìdì pabwìpì dìbà kanà dyònsò didì muntu kanà yònsò ewu mufwànyine kuyijinga. Mukalenge Maguire ewu neikalè mukùmbàne mwà—mwà kunùpèèsha bintu ebi. Nènku ndi muswè kwangacila cyena-bwalu, mu cyena-bwalu eci, èyowà's wè, mùshindù ewu nè: *Buloba Bùdì Kàbìdì Munkacì Mwà Kudìshìnda.*

²⁸ Tuvwa twenda tupweka makèèlèlè, anyì dilòòlò dishààle adi, tucipila mu Memphis, mu Tennessee, kubwelamu bu dìbà dipite bikolè mu mapingaja, anyì citùpà cyà dilòòlò. Kàdì's bìvwa bikolè bwà twètù kupicila mu misèèsù, bânà ba—balela nè bantu bàvwa bungwile bikolè be. Ki mèmè kudyàmbidila nè: “Eci ncifwànyine kwikala cinyì?” Ba—bantu kabàvwa bavwàle bu nè bàvwa ku disangisha dyà butèndeledi bu mùdì pàmwàpa mwanèètù mwìmpè ewu, Billy Graham anyì Oral Roberts to. Kàdì ncivwa ngèèla meeji nè bàvwa mu distriki adi mu cikondo aci to, mu mishindù yònsò. Nènku bakàjì bàvwa bavwàle mipanù, nè bânà bakesè bàvwa babànyùngùlùkile, bàvwa ànu

bavwàle binsalàbeetà, nè bikwàbò, binsalàbeetà byà kuulu nè kwínshì. Ke mèmè kudikonka nè civwa ncinyi, ke ndekeelu wa byónsò twètù kujandula's. Bàvwa nè—nè dyenza dyà bikàsa dyà Taatù Noël. Kwakadi binunu byàbùngi byàkadi munkaci mwà kubibandila mu misèsùs amu, nè bikwàbò. Nènkù tuvwa tufùma ku dipicila mu cikondo cyà bwalu bukòlè mu Memphis, bwalu ncikondo cyà Noël civwà cìlwa.

²⁹ Nènkù's Noël nditùkù dinène dyà bungèndààmùshìngà, mu mùshìndù wà nè bikaadi byàmba kupita nè Disàkidila diinè, bwalu . . . mu—mu bungèndààmùshìngà, twamb'eku twamb'eku; bwalu bu—bungèndààmùshìngà mbutàmbe kupeta bwenzeji kùdi Noël, bwalu bantu bààbùngi bàdi bàsùmba bintu be. Nè bàdi ànu . . . Disàkidila didi ànu dyènda dìshààla ku luseka. Nènkù tudi tujandula nè, bu mutùdi tumòna Noël munkaci mwà kuseemena kàbidi emu, mvwa ndyàmbidila nè mbifwànyine kwikala cintu cìmpè cyà kwakula pa cyena-bwalu eci, patùdi twenda tuseemena pabwìpi nendè apa. Bu mùdibi nè, mu bushùwà bwà bwalu, Noël kèna . . .

³⁰ Tudi tutwà cyanga bwà ditùkù dyà 25 dyà ngondo wa ciswà-munène edi bwà mufikilu wà dilediibwa dyà Kilistò, kàdi, mu bushùwà bwà bwalu, muntu kanà yónsò ewu mmumanyè nè kacìvwa mufikilu wà dilediibwa dyà Kilistò to. Aci's civwa mmufikilu wà dilediibwa dyà nzambi-dìbà wa cyena Loomò, bwalu pàakakùdimunà èkèleeziyà mucimà, anyi, kutwàdiibwa mu cyena Kàtòlikè, pàakenjiibwàku nsangilu wa ku Nicée. Pamutù pàà kwikalaci “dyà nzambi-dìbà,” bààkacyèna mufikilu wà dilediibwa dyà “Mwànà wa Nzambi.” Apu mpàvwa, dìbà, kubangila ku dyà20 too nè . . . Ndi njinga kwamba nè dyà 21 too nè ku dyà 25, ndyenze bu didi mu dyàdi . . . Ndi mupwè nè mwoyi dìnà dinùdi nucibiikila, mu bulelèlà. Ndìbà didìbi bikòlè mu kapwishipwishi kàmwè-anyi-tùbìdi twà dìbà pàdidì dipicila mu citùpà aci. Nènkù civwa mmufikilu wà dilediibwa dyà nzambi-dìbà, kàdi bóbò kwangata ànu “Mwànà wa Nzambi” nè kwenza mufikilu wà dilediibwa Dyèndè, bwà kubibwejakaja nè bilèlè byàbò byà cimpàngaanù abi. Nènkù kacýènakù nànsha bìshi, nànsha kakesè, mufikilu wà dilediibwa dyà Kilistò to.

³¹ Yèyè kàvwa mwà kulediibwa mu aci cikondo to, bwalu Yudààya ùdi ànu byà mwomùmwè bu pa—pa . . . mutùmbùke pa mushoonyi wà équateur, ànu mùdi mwab'ewu, nènkù tudi—tudi tujandula nè, mu Yudààya, mu cikondo cyà muvù wà mashika, mu matùkù 25 à ngondo wa ciswà-munène, yèyè ùdi mu mabungi à nèjè nè mukwàte mashika. Balami bàà mikòòkò kabèèna mwà kwikala pa kakùnà apu to, nè kùdi tubingilà twàbùngi twà nè kacìvwa mwà kwikala nànkù to.

³² Nènkù kàbìdi Yèyè wàkalediibwa bilondeshile bufùki, ànu mùdi bufùki bukwàbò bwónsò ebu, Yèyè—Yèyè kupàtuka mu muvù wà bintu bitòloka. Pa ciibidilu pàdi bàna bàà mikòòkò

bàlediibwa, mmu movù wà bintu bitòloka; kàdi's Yéyè ùvwa Mwànà wa mùkòòkò. Mpindyewu, ndi ngèèla meeji nè, Yéyè wàkalediibwa, bwanyì mêmè, mu ngondo wa lwabanya, wa cisanga, anyì mwaba kampàndà lwà muntwamu, mu ntwadijilu wa movù wa bintu bitoloka awu.

³³ Kàdi tudi tusangana nè bàakacyenza ditùkù dyà disùmbisha dyà màshàndwishì. Bantu búngwila mu mìsèèsù, kàdi bàlaabangana makaaya, nè bàkòkangana pa bintu, nè bàdikonka bwà kupèèsha muntu kampàndà ditàpishì, búngì bwà mfrangà yìkalàbo mwà kucitùùdila.

³⁴ Ditùkù adi, mvwa mukème. Mvwa mwimàne mu mwaba kampàndà, nè baainábànzà bàbìdì bàvwà munkacì mwà kuyiikila bwà kupèèsha tatwàbò mufiikilu wà dilediibwa... anyì ditàpishì dyà Noël bwà cidimu eci. Ke umwe wabò kwambayè nè: “Mémè ndi mumupètèle mùlàngì wà maalà à wiskí.” Ke mukwàbò kwambayè nè: “Ndi mumupètèle dibùkì dijimà, anyì carton kàà mfwankà,” anyì cintu kampàndà cikwàbò cyà mùshindù awu. Nènku bàvwa bàmba nè, umwe ùvwa mufile byàbúngì bwà wiskí kutàmba movwàbò bafìle bwà mfwankà.

³⁵ Ke mêmè kudyàmbidila nè: “Piikalà aci ní kî mmùshindù wà kufila kùdì—kùdì... kushintakaja anyì kufila ditàbishì bu civùlukilu cyà Yesù Kilistò, Mwànà wa Nzambi!” Ncintu kaayi cyà kupeta naaci lufù's wè!

³⁶ Nè ndi mmòna buloba bwètù mu dibungama dyà menemene mùdìbu mpindyewu emu, bukooyike eku nè eku, kakùyì mùshindù nànsha wùmwe pa buloba bwà bwóbù kwalukilàkù mu bwóbò cyàkàbìdì to. Mbímpè twètù kutèya ntèmà, ku citudì twenza mu matùkù aa. Bwalu tudi, ànu mwaba ewu mu madilu, à bùmwe bwà ku maalu à dibugama dinène, nè—nè bùmwe bwà ku à manène... Kacya katùtukù beelè meeji nè cintu aci ncifwànyine kwenzeka mu Àmèrikè to, kàdi's ncyòci eci ànu apa mu mishindù yònsò. Nè dilekelela dyètù twètù biine dyà Èvànjeeliyò, mmukunya wònsò kùdì misàndà nè bintàkanyì bu nànkù, nènku nebitambe kubiipa. Kakwèna mpatà nànsha yà kànà to, mu meeji àanyi, bwà nè nebiikalè nè cyà kutungunuka nè kwenda kubiipa.

³⁷ Kàdi tudi tujandula nè, mu Noël ewu, bwà kufika ku cyena-bwalu aci, nè Noël ewu ùdì ùsangana buloba ànu mwàkadibi kùkaadi bidimu binunu bìbìdì amu, pàakalwà Yesù. Kí mmushintùlùke bikolè menemene to kubangila ànu piinè apu. Bwalu, eci, Noël awu wàkasangana buloba munkacì mwà kudìshìnda, nè bùvwa munkacì mwà kukèba Maasiyà bwà kubwàmbulwisha bwà kubùlama pàmwè. Nènku—nènku ke mùshindù wùdìbi nànkù leelù ewu, tudi twenza cintu cimwècimwè aci. *Buloba Bùdi Kàbìdì Munkacì Mwà Kudìshìnda.*

³⁸ Mpindyewu, aci kî ng'ânu mu Àmèrikè emu nkààyaamù to, kàdi aci's cidi mu buloba bujimà, mwaba wònsò wúyaayà awu; bukwantèdeleelu, beena cidiidi, mu bintu byònsò, mu—mu beena maalu à bukàlàngà. Cidi—cidi, kacicyènakù ànu kàbidì to, cidi ànu. . .Nsòmbelu wa bukàlàngà ùdi ànu munkaci mwà bantu bimpè, kàbidì, nè aci's ncikolè be bwà kucipeta. Bidi—bidi bundù. Nè cidiidi nè bikwàbò byònsò mbinyangùke, mu mùshindù wà nè cintu cijimà cidi cisaama cyùle nè mpùtà yà tufinà, kuumukila ku mutù too nè ku makàsà, buloba bujimà. Ndongolwelu wetù wa cidiidi, ndongolwelu wetù wa ntèdeleelu, ndongolwelu wetù wa maalu à bukàlàngà, byònsò bitùdi naabi, mbiyè! Kòkù, kakwènakù ànu mùshindù wà kucilama pàmwè to. Yèyè, kwèndè nkumanè kujika! Kùdi. . . Tukàadi ku ndekeelu kwà njila. Ke cyònsò cidiku ncyôci aci.

³⁹ Twètù, ndi mumanyè nè tudi baakùle pa bwalu abu kùkaadi ntàntà mule, kàdi dimwè dyà ku matùkù àdi panshi aa neciikale bwalu bumana kwakula bujikè, neciikalè cintu cyà bwalu-bulonda, nènkù netùdisangànè pambèlu twètù katùyì batàngile dîbà edi to.

⁴⁰ Ndi ndikonka, bu twètù aba mu Noël ewu, bu Nzambì mwà kuMutùma cyàkàbidì mwàkènzàYe kale wàwa kùkaadi bidimu binunu bibìdi amu, bu Yèyè mwà kutùtùminaYe mu cidimu cyà 1964, ndi ndikonka ní katwènakù bafwànyine kwenza Nèndè mwàkènzàbò musangu awu amu anyi? Ndi ndikonka ànu nè Dilwa Dyèndè ní ndifwànyine kwikalakù ditàmbe, ní bààMwakidila bilenga, mu—mu—mu maalu à cidiidi anyi mu bukwantèdeleelu, kutàmbe mwàkadiYe musangu awu amu? Ndi ànu ndikonka ní tudiku mu mùshindù wà kuMwakidila, mutàmbe mwàkadiYe musangu awu amu? Kàdi tudi bamanyè nè Yèyè wàkabèngiibwa musangu awu.

⁴¹ Citùdi bafwànyine kuMwenzela ncinyi bu Yèyè mwà kulwa? Pàmwàpa bukwantèdeleelu, bündi mujaalàmijilepù eci abu, mbufwànyine kuMwenzela mwàkamwenzelàbù musangu awu amu's. Bàvwa mwà kuMupoopela pa nkùrusè bu bóbò mwà kukùmbana, (kí mbashintùlùke to), bwà kabingilà kàmwèkàmwè kàakacyènzèlàbò musangu mukwàbò awu aku.

⁴² Bàakacyènza bwà cinyi, bàakapoopela pa nkùrusè Ewu mene uvwàbò bàsambidila bwà kulwa pa buloba awu, bwà kubàsùngila, bwà kubàpàtula mu cimvundù cinène aci? Bàakapoopela pa nkùrusè ditèkemena dimwèpelè divwàbò naadi's. Bwà cinyi? Bàakacyènza bwà cinyi? Bwalu, pàakandamunà Nzambì disambila dyàbò, Wàkadyàdamuna mu mùshindù wàkadibo kabàyi batèkèmène nè nedyàndamunyiibwè to. PàakalwàYe, Yèyè kàakalwakù ku mmwènenu wa tèlòlòjì wabò awu to.

⁴³ Nènkù bu Yèyè mwà kulwa cyàkàbidì, leelù ewu, Ùvwa mwà kulwa mùshindù wùmwèwùmwè awu; pambèlu pa mwenya wà

maalu à pa buloba anyi tèòlòjì wa maèkèleeziyà, nè mùshindù wùvwàbo bafwànyine kuMwelela meeji. Yèyè útú ùlwa misangu yònsò, bu Nzambì . . . Bantu, pàdìbo bàpeta lutàtu, nè bàsambila, díbà adi Nzambì ùdi ùbàpèèsha cidìbo bàsambidila aci, kàdi Ùdi ùcifila mu mùshindù wùdi mwímpè bwàbò awu. Kàdi's bààkaCibenga, bwalu Kacyàkalwa mu mùshindù wùvwàbo bèèla meeji nè Cìvwa nè cyàkulwa. Bààkabènga Díyi dilaaba dyà Nzambì, pèndè's Yèyè ke Díyi.

⁴⁴ Mpindyewu, Nzambì, mu bikondo byònsò, misangu yònsò, pààkabangàYe: “PààkaakulàYe Díyi Dyèndè mu bikondo byà kale mu bapròfetà, mu matùkù à ndekeelu aa mmwakwile ku Yesù Kilistò, Mwan'Èndè,” tуди tusangana nè cyònsò cyà ku bipròfetà abi cìvwa nè cyà kukùmbanangana nè cikondo kampàndà. Ànu bu Mfùmù Nebùkàndànèèsà pààkapetàye cilòòtà eci, nè bàà Bisàmbà byà bendè kuumukila ku mutù too nè ku makàsà, nè Danyèlè wàkafila dyumvwija dyà cilòòtà eci; cìvwa ci—cìpròfetà kùdi bàà pa buloba bujimà, kashidi, kasùmbù kònsò kàà Bukalenge bwà bàà Bisàmbà byà bendè, mùvwàbo mwà kuumuka ku mutù kuya ku makàsà. Nè bapròfetà bàtu misangu yònsò ànu bààkula Mèyi àvwà nè cyà kwenzeka mu cikondo nè cikondo cyònsò. Nènku pàdi Nzambì . . .

⁴⁵ Bantu bàpeta lutàtu, nè Nzambì ùbàndamuna. Ùdi ùbàtùmina mupròfetà mulaaba anyi mùsànjeelà wa mùshindù kampàndà, bwalu Yèyè kèna mwà kwalukila pa Díyi Dyèndè didiYe mukòse bwà cikondo aci to. Kàdi, cidìYe wènza, Ùdi ùtùma mùsànjeelà bwà kwenza citùpà cyà Díyi aci nè mwoyi bwà cikondo aci. Ke cìtùci cyènza misangu yònsò, nwamònu's. Wàkenza Díyi Dyèndè ku cibangidilu. Ùvwa mumanyè ndekeelu kacya ku cibangidilu. Wàkaakula Díyi Dyèndè. Nènku mu cikondo cyònsò, pàdìbo bàpeta lutàtu, bàvwa mwà . . . bàvwa mwà kusambila, nè Nzambì ùvwa mwà kutùma mwela maanyì. Nènku mulaaba maanyì awu kakùyi mpatà to ùvwa mufwànyine kwenza bwà mulayi wà cikondo aci awu, wùvwà mudyanjila kwamba bwà cikondo aci awu, kwikalawu nè mwoyi. Nènku ke cidìYe wènza díbà dyònsò. Nzambì kàtu ùshintululakù ndongamu Wendè to. Mpindyewu, kacya katùtukù bânji kupeta Nzambì ùshintuluka to.

⁴⁶ Nzambì wàkaciyaadika musangu kampàndà, mùvwàYe mwà kusùngila muntu, cìvwa mmu budimi bwà Edènà, mwínshì mwà mashi meela panshì. Tudi bateetè ndongolwelu mukwàbò yònsò, kuumukila ku mabèjì à mfigì too nè ku dilonga dyà tulaasà, dilonga dyà nsòmbelu, màngumba à ndongolwelu, nè bikwàbò, nè katùpà kònsò kààci cyà—cyàkabèngiibwa; kàdi kacyàkakùmbanakù to, kacyàdyàkukùmbanakù to. Nzambì neàtwilanganè nè muntu ànu mwínshì mwà Mashi meela panshì, nè ke mwaba wùmwèpelè wàtwilanganàYe nendè, bwalu aci ke cìvwa dipàngadika Dyèndè dyà kumpàlà. Yèyè kààdyàkutwilanganakù nè muntu mwínshì mwà ndongolwelu

wa bukàlàngà to. Yèyè kààdyàkucyènzakù nànsha kakesè, mùshindù nànsha wùmwèpelè pa buloba to! Alùkilaayi ànu buludì ku Njila wa Nzambì, ke cyàkambàYe dyàmbedi ncyôci aci. Nè Yèyè kèna nè mikàlù to, kèna mwà kushintuluka to, nè Ùdi misangu yònsò ànu umwèumwè awu. Ke mwaba wùdiYe ùtwilangana nè muntu, nè ànu mwaba awu nkààyamù. Ke bwà cinyi tudi tupanga kwenza bwobùmwe leelù ewu, ke bwà cinyi èkèleeziyà mmutàpùlùke bikolè, bwalu yònsò wa ku yòyi mmutàpùlùke mu ndongolwelu kampàndà, nè, pàdìbo bènza nànkù, díbà adi Nzambì ùdi ùbàbènga, ànu mwaba awu. Yèyè mmuswè bwà twètù kutwilangana mwínshì mwà Mashì, mutùdi nè bintu byònsò bitèeka pàmwe, kwínshì kwà Nkùrusè aku. Kiiipàcilà kàmwèpelè kàà Nzambì bwà kucyènza! Nzambì ùtu misangu yònsò ànu ùtùma Dìyì Dyèndè.

47 Nènkù tudi tusangana, leelù ewu nè, buloba leelù ewu bùdi ànu mwàkadìbu mu ditùkù adi amu; bùdìsangana, ndongolwelu wabù wa cidìidì, nè bikwàbò, byònsò munkaci mwà kudishinda, nè bindile maasiyà kampàndà wíkala mwà kubùlamakaja pàmwe.

48 Mpindyewu, mwàkù *maasiyà* mbwena kwamba nè “mwela maanyi,” cintu kampàndà cilaaba maanyi. Nzambì! *Eci* ndibuulula dyà Yesù Kilistò, mukàndà mujimà wàkatwibwa cìtampì nè Bìtampì Mwandamutekète byà dibuulula dyà Yesù Kilistò. Yesù Kilistò ùvwa mu Genèsè; Yesù Kilistò ùvwa munkaci mwà Mukàndà. Yesù Kilistò ùvwa mu—mu Ekèsòdè nè mu Genèsè, nè Yèyè ùvwa munkaci mwà Mukàndà nè Ùvwa mu—mu Dipungila Dipyadìpyà, nè mu Bwàkabuulwibwà nè too nè ku ndekeelu: “umwèumwè awu makèlèlè, leelù, too nè kashidi.” Byònsò abi’s n’Nzambì!

49 “Ku cibangidilu kwàkadi Dìyì, nè Dìyì dyàkadi nè Nzambì, nè Dìyì dyàkadi Nzambì. Nè Dìyì dyàkavwijiibwa mubidi nè dyàkasòmbela munkaci mwètù.”

50 “Nzambì mu bikondo byà kale nè mu mishindù mishilèshilàngàne wàkaakwila nè baataatù kùdi bapròfetà.” Pàakalwà Dìyì dyà Mukalenge kùdi bapròfetà, nè ànu bóbò nkààyabò, bwalu bàvwa balaabiibwe nè Dìyì, bàvwa nè bukenji bwà kuumvwija Dìyì. Nè Nzambì ùvwa ùkwàcila mudimu ku bóbò, ùjaadika nè Dìyì divwa dilelèlè. “Piikalàbi nè Mèmè. . . kòkò muntu munkaci mwènù mwikàle wa nyumà, anyi mupròfetà, Mèmè Mukalenge neàDimanyishè kùdiye. Kàdi cidìye wamba cyôci cyenzèke, díbà adi nùmuteèlèjaayi. Cyôci kaciyi cyenzèke to, kanùmuteèleji to.” Aci kí ncipite dilukakaja dyà lungènyì dîmpè to, bwà muntu kanà yònsò ewu.

51 Mpindyewu tudi tudìsangana kaaba aka, mu matùkù à ndekeelu mpindyewu, patùdi bindile Dilwa dyà Mukalenge cyàkàbìdi apa.

52 Nudi bavùlùke bîmpè muyiishi mununu wa ba-Baptistes wàkambàtiiza mu Dìnà dya Yesù Kilistò awu, pàncìvwà ànu mwànà mutekète. Nènku ùvwa nè ciibidilu cyà kukòkangana naanyì pa cyena-bwalu eci, bwà Yone Mubàtiji. Yèyè nè: “Mwanèètù Billy,” yèyè nè: “pàvwà Yone. . . Pàakambàye nè: ‘Itàbà bwà bìikale nànkù,’ nè pashìishe yèyè kuMwitabila.” Yèyè nè: “Pashìishe Yone, wàkabàtiiza. . . Yesù wàkabàtiiza Yone, bwalu tudi bamanyè nè Yone kacya kàvwakù mwanji kubàtijiibwa to, kàdi nànsha nànkù ùvwa ùyiisha dibàtiiza.” Èè, aci’s cìvwa misangu yònsò ànu cyenze bu cìdi cìnjànguluja, ndambù’s.

53 Pashìishe mwab’ewu ànu matùkù mashàale aa, cyàkabuuludiibwa kùndi, mu mùshindù ewu, nè bàakatwilangana kuntwaku mu dijiba amu, mu ciinà cyà màyi aci, baamisànjeelà bàbìdi bàà batàmbe bunène bàkaadikù bàà pa buloba ebu bamòne: mu—muntu uvwa kumutù kwà bapròfetà bònsò, uvwa Yone awu, “kacya kakùvwakù muntu nànsha umwe mulela kùdi mukàji, munène bu yèyè to”; nènku kùvwa Nzambi, Yèyè nkàâyendè, mumwèneshiibwe mu mubidi wà musunya. Nènku vùlukàayi, nè Bible ùdi ùtwàmbila nè: “Dìyi dya Mukalenge dítu dílwa kùdi mupròfetà.” Nènku pàakavwijiibwà Dìyi mubidi; ke mupròfetà ewu mwimàne mu màyi. Nènku Dìyi nè mupròfetà bàakadisanga, bàakamanyangana ewu nè mukwèndè! Cyà bushùwà. Dìyi Dyòdi diinè, divwijiibwe mubidi, Mwànà wa Nzambi mwandàmùke mubidi, dyàkalwa kùdi mupròfetà, mu màyi.

54 Mupròfetà wàkamba nè: “Bìdi bìkèngela bwà mèmè kubàtijiibwa kùdi Wèwè, kàdi bwà cinyi Wèwè udi ulwa kùndi?”

55 Yèyè nè: “Itàbà bìikale nànkù, bwalu mbikùmbane mùshindù ewu bwà twètù kukùmbaja bwakàne bwònsò.”

56 Mònaayi’s! Yone, bu mùvwàye mupròfetà, ùvwa mumanyè nè Yèyè nguvwa Mulàmbù awu. Nè mulàmbù wùdi nè cyà kusukudiibwa kumpàlà kwà kufidiibwawù bu mulàmbù. Nènku ke bwà cinyi byàkakèngela bwà kubàtijiibwaYè.

57 Kaa, leelù ewu, mbitùkùmbànyine, bwà twètù kukùmbaja bwakàne bwònsò bwà ditùkù dyètù. Dibà dyàkùmbanyi. Bible ùdi ùtwàmbila cìdi nè cyà kwenzeka mu ditùkù edi. Tudi bamanyè cìdi Bible wàmba nè necyènzekè mu ditùkù edi. Abu mbutùtàngile bwà kushàala bakwàte Nzambi too nè pàdi maalu aa ènzeka. Ke díbà ndyòdi adi! Sambilaayi bwà mwela maanyì wíkala mwà kutùpèèsha disùngidiibwa ditùdi bindìle adi, bwalu Nzambi ngudi mucilayè.

58 Bàakabènga Dìyi dilaaba dya Nzambi díbà adi, nànkù awu cyàkapòna panshì, cyàkadishinda. Nè kàbìdì tudi tusangana nè, mu cikondo eci, cìdi kàbìdì munkaci mwà kudishinda. Ndi njandula, múngàmbi nè, cìdiidi cyètù ncibolé, nsòmbelu wetù wa

èkèleeziyà mmunyangùke. Cidi cyenzèke ncinyi? Cidi cicyènzè ncyôci eci; dibà dyônsò dyûdi uya kule naaci, dibà kanà dyônsò, kule nè ndongamu wa Nzambi, neupetè dibola. Kacyèna mwà kwimana to. Díyì dyà Nzambi kaditu dipangila to, nè kakwèna cintu cikwàbò nànsha cimwè cyàngata kaaba kààDi to, nànsha kakesè.

⁵⁹ Ndongolwelu wetù wa dilonga dyà túlaasà, ndongolwelu wetù wa cyena-màngumba, mmwangàte kaaba kàà Nyumà Mwimpè bwà kulombola mu èkèleeziyà. Dilongeshiibwa dyètù dinène menemene dyà bambi nè bikwàbò mbyangàte kaaba kàà—kàà masangisha à milòmbò à bufùkù bujimà, nènkù mùshindù wà kale wutùvwà tukafika kùdi Nzambi awu's. Mpindyewu, pamutù pàà kwikala nè bayiishi, tudi nè benji bàà miyiiki, bantu mbamanyè Díyì ànu bimpè menemene, bàdi mwà kusòmba mwaba awu nè kuDitèeka pàmwè mu mùshindù wà bikèmesha nè mùdìbò bàcyènta. Mbamanyè byamù bilamakaja, kàdi aci kí m'Bukolè bwendeshi nànsha. Twètù tudi baswè Bukolè bwendeshi abu. Nànsha byamù bilamakaja biikàle binganyi; ndi muswè kumanya Bukolè bwendeshi. Ncinyi cidiBu wènta?

⁶⁰ Ncyèna mumanyè mùshindù wùdi kàshinyi aku kànyeema lùbilu kuntwaku to. Kàdi nè pistons nè cylindres, kàdi ncyèna mumanyè búngi bwà bukolè bùdìku kàkwàta naabù mudimu to. Cintu cimwèpelè cìndi mumanyè m'bukolè bwendeshi, bùdi bùkàpàtula nè bùkèndesha.

⁶¹ Ke citùdi bamanyè ncyôci aci, Nzambi wàkafila mulayi nè: “Mèmè nèngiicikijè Nyumà Wanyi pa mubidi wònsò, bàna bèènú balela bàà balùme nè bàà bakàji nebàmbè bipròfetà.” Mmunyi mwikalàYe mwà kucyènta? Ncyèna mwà kunwàmbila to. Ndi muswè ànu kumanya Bukolè bwendeshi bwà ndongolwelu wa Nzambi abu. Ke cintu cyà mushinga ncyôci aci.

⁶² Leelù ewu tudi balonge byamu bilamakaja too nè mùdi byònsò bilwè ànu byamu pa byòbi. Kàdyèndelandelà nkimpè ku cinyi kakùyì cintu kampàndà munda mwàkù bwà kukèndesha? Makènkè mmimpè ku cinyi piikalà—piikalà. . . anyi ndungilu, kòkù kakùyì nzembu nànsha mikesè munda mwàbù? Nwamònu's, tudi nè byamu bilamakaja byònsò, tudi nè bilongelu nè balongeshanganyi, nè bikwàbò, bìdi mwà kulongesha muntu, mu mùshindù wà nè ùdi mwà kwimana mu cyambilu nè mishindù yà bwena ayi mu mùshindù wà mwikàle mwakudi wa dipòkò. Aci kacyèna ànu citwàla Bukolè bwà Nzambi to. Bukolè bwà Nzambi bùvwà kale wàwa bwà èkèleeziyà abu bùdi penyì? Dibènesha dyà mpenta divwà pa ciibidilu dipòngoloka mu maèkèleeziyà adi didi penyì? Ke bwà cinyi buloba bwètù bùdi munkaci mwà kudishinda, bwalu tudi buumùke ku mèyì-makùlù malelèlè à Nzambi, nè balongeshe bantu túlaasà mu ndongolwelu nè bikwàbò. Nènkù ke cidi citùbweje mu ngiikàdìlù utùdi leelù ewu ncyôci aci. Ndi

ngùitabuujà nè ke bwà cinyi buloba bwètù bùdi munkaci mwà kudishinda.

⁶³ Myandà yà bikùmà eyi yìdi pa buloba kacya ku matùkù à Noà. Tudi tujandula nè pàdì Nzambi...wàkadi nè Noà, mupròfetà wa bwakàne, ùpàtuka nè mukenji wèndè, kùvwa mwandà wà nsòmbelu wa masandi mu ditùkù adi, mùdì Bible mwambè nè: “Bàdya, bànwa, bàsèlangana, bàsèleshangana.” Tudi tujandula nè, didyà dipicisha nè nsòmbelu wa masandi, nè bikwàbò, byàkenzeka mu ditùkù adi. Ke pashiishe buloba kudishindabò bwalu bantu bàakabènga mukenji wà Nzambi, bwà ditùkù adi. Noà ùvwa mupròfetà mulaaba maanyi kùdì Nzambi, mutuma kùdì Nzambi, mwikale nè mukenji wa kùdì Nzambi, nè yèyè wàkapèesha bantu didimwija kumpàlà kwà cilumbulwidi kulwaci. Ki kukenyabò ku ménù nè kusekabò, nè kucyèlulwilabò, nè kusekabò, ke ndongolwelu mujimà wa buloba kupònayè panshi, mu ditùkù adi, nènku bàakiinyijiiibwa mwĩnshì mwà mbù. Ncyà bushùwà. Bwà cinyi? Bàakabènga mukenji wà dībà.

⁶⁴ Tudi tujandula nè cintu cimwècimwè aci cyàkenzeka mu Èjiipitù, pàakalombolà Mòsà bānà bāà Izalèlèla apu. Ndongolwelu mujimà wa cyena Èjiipitù ùkaavwa munyangùke. Nènku tudi tusangana mpindyewu nè cyàkenzeka cyàkàbìdì, pàakatùmà Nzambi mùsànjeelà mulaaba kuntwaku bwà Dìyì Dyèndè. Cìvwa mbwà kuuja Dìyì Dyèndè.

Wèwè udi wamba nè: “Cìvwa mbwà kuuja Dìyì Dyèndè anyi?”

⁶⁵ Wàkambila Abraham nè ke cìvwaYe mwà kwenza menemene aci's. Nènku bìvwa bikèngela bwà kulwakù muntu kampàndà mu cyalu, pa dībà adi, bwà kuvwija Dìyì adi nè mwoyi ànu kumpàlà kwàbò mene. Nzambi ùvwa mutùme Mòsà Wèndè kuntwaku, nè, cintu ciinè cyàkalayàYe bwà kwenza aci, wàkacyènza, bwalu yèyè nguvwa Dìyì dilaaba bwà dībà adi. Wàkamba nè cìvwa mwà kulumbulwisha bàà pa buloba's. Dìyì dyà Nzambi dyàkamba nè: “Nèndumbulwishè ditunga adi nè maalu manène à kukèma nè à bukòlè nè bimanyinu.”

⁶⁶ Ke muntu awu mwimàne mwaba awu, ànu muntu wetù wa pàtupù ewu bu wèwè anyi mèmè kùnu, mwikale nè Dìyì dyà kùdì Nzambi, nè kupàtuka kuntwaku kàdì kwakula nè bufùki kumwènekabò. Yèyè nè: “Lèkèlè...” Kwambulayè lusenga, nè kwamba nè: “Nkùpà yipàtukè mu buloba.” Nènku Dìyì dyà Nzambi, mukana mwà mupròfetà awu, mùvwàbì nè òvwa ànu mu dībà òvwàdì nè cyà kwikala, nkùpà kubwikila buloba bujimà. Wàkabwikila buloba nè ndimbà, nè nkùsù. Wàkabùwikidija nè mìshindù yònsò yà—yà cikupi nè bikwàbò. Bwalu, Nzambi wàkenza mulayi, nè dībà òvwakù bwà wòwò kulaabiibwa, Dìyì dilaaba bwà dībà didìbò nè mwoyi adi.

67 Ke cìdì citùkèngelà leelù ewu, kí nkwalukila mu ndongolwelu kampàndà wa sèminèrè to, kàdi Dìyì dilaaba bwà dībà ditùdimu nè mwoyi edi, bwà kutwàla cyàkàbìdì Yesù Kilistò kùdì bàà pa buloba: “Umwèumwè awu makèèlèlè, leelù, too nè kashidi.” Kùdì—kùdì ndongamu mutèèka mwaba awu bwà ditùkù edi, mulayi wà Nzambi. Nè mùshindù wùmwèpelè wutwikalàku bakùmbàne bwà kwikala mu bulongame, ngwà kulekela Dìyì adi dilaabiibwa maanyi. Ncyà bushùwà. Cìtu misangu yònsò ànu cyezèke. Eyowà.

68 Tudi tusangana dikooyika dinène dyà maalu à nsòmbelu mu matùkù à Nebùkàndànèèsà. Yèyè ùvwa nè muntu mulaaba. Pàakalwà cyanza cìvwa cìfunda ku cimanu aci, Yèyè's ùvwa nè muntu uvwa mwà kucibala.

69 Matùkù à Lotà nè Sodomà, tudi tusangana kàbìdì buloba munkaci mwà kudishinda. Nzambi wàkasungila cìvwa mwà kusungidiibwa, kucipàtulamù.

70 Mu matùkù à Yesù Kilistò, tudi tujandula nè ndongolwelu mikwàtakaja kùdì bantu ayi yìvwa mitèèke buloba bujimà mu ngiikàdìlù wa mùshindù awu, nè cìdìdì cyàbò cyà ditùkù adi, mu mùshindù wà nè, bòbò, buloba bujimà bùvwa munkaci mwà kudishinda, ku Noël wa kumpalà awu.

71 Mpindyewu tudi bènzè cintu cìmwècìmwè aci, balùkile buludì nè banyangàkàje Dìyì dyà Nzambi, ku ntèndeleeleu wa ndongolwelu, mu mùshindù wà nè tudi bacìsangane cidishinde. Ncinyì cyà ku ndongolwelu ayi citùdì mwà kweyemena mpindyewu's? Ndongolwelu kaayi utùdiku mwà kuyamù, wa ba-Méthodistes anyi, wa ba-Baptistes anyi, wa ba-Presbytériens, anyi ndongolwelu wa beena Mpenta? Kakwèna cintu nànsha cìmwè citùdì mwà kwenza to ànu kwalukila ku Dìyì dilaaba dyà mulayi bwà dībà edi. Ndongolwelu eyi's mmitekètàngàne, kayiyi nshindameenu. Yòyi, yìdì, yìdì ndongolwelu mikwàtakaja kùdì bantu, nè kayàakunùsùngila to. Munda mwàyi kamwèna Mwoyi to. Mwoyi wùdì ànu mu Dìyì dyà Nzambi. Dyòdì ke Mwoyi. Yèyè ngudi mwàmbè nànkù.

72 Nè mùshindù wàkadibi musangu awu, pàvwàbo bàsambila apu, bantu bàdì bàdisangana ku ndekeelu kwà lwendu lwàbò, anyi bashiikile, ànu mwàkadibi mu matùkù à Noà nè matùkù à Mòsà, nè bikwàbò. Pàdìbo bàdisangana, nè kabèèna kàbìdì nè kwà kuya to, dībà adi ke kubangabò kusambila. Nènku pàdìbo bàbanga kusambila, Nzambi ùdì misangu yònsò wàdamuna. Dībà adi Yesù wàkalediibwa.

73 Buloba mu ciine cikondo aci, ànu bu mungàmbi nè, bùvwa munkaci mwà kudishinda. Ditungà nè ditungà dyònsò ùvwa dikèba maasiyà kampàndà, ànu mutùdì leelù ewu emu. Loomò ùvwa munkaci mwà kukeba mwena meeji matwè munène kampàndà, mwabilaayi kampàndà munène uvwa nè màyelè ònsò à busàlaayi awu, bwà wàmòna mwà kuya kuntwaku nè

kwipatangana nè beena Ngelikà nè bakwàbò bàà pa buloba abu. Grèce ùvwa ùkèba cintu cimwècimwè aci, muntu kampàndà uvwa mwà kubàmbila mùshindù wùvwàbo mwà kucimuna bakwàbò bàà pa buloba.

⁷⁴ Batèndeleeedi bàà cyena Yuudà bàà mu ditùkù adi bàvwa bindile kalààlà kàà màsàlaayi. Bààkeela meeji nè kùvwa mwà kulwa Maasiyà ùfùmina mu Dyulu, mwikàle nè dikombo dinène dyà cyamù mu byanza byèndè, nè Ùvwa mwà kucimuna Loomò, kubàdyatakaja ku makàsà kubìimansha mu mbù. Nè bônso abu, bàvwa bindile muntu wa mùshindù awu. Bàvwa bàjinga kalààlà kàà màsàlaayi.

⁷⁵ Ànu mùdi musùmbà mujimà wà màngumba ètù à leelù ewu aa, màngumba ètù àdi àkèba muntu wa mutàmbe bakwàbò. Ditùnga dyètù didi dikèba muntu wa mutàmbe bakwàbò. Russie ùdi ùkèba muntu wa mutàmbe bakwàbò. Bantu bàà ku esètè bàkèba wabò. O.N.U. ùdi wènda ùkèbangana nè wèndè. Èkèleeziyà yìdi yìkèba wàbò. Kàdi ngwa mùshindù kaayi udibò bàkèba awu's?

⁷⁶ Russie ùdi ùkèba maasiyà udi mulaaba nè—nè bwongò udi mumanyè mùshindù wà kubàkòòkeshila cibwàshìbwàshì, kutàmba bakwàbò bônso ku diya dyà ku ngondo. Mbaswè kukòòkesha buloba. Aci's cidi ànu . . .

⁷⁷ Kàdi, nudi numòna's, pàdìbo bàlòmba bintu ebi, nè bàlòmba cikampàndà, kabèena bàlòmba mùvwà Yesù mwàmbè to. Tudi tuteeta kuvwija Nzambì bu—bu mwànà wa kutùma nè njàntà nè: “Mukalenge, Wèwè ngenzèlè *cikampàndà* eci! Nè Wèwè ngenzèlè *cikampàndà*! Nènku Wènzè *cikansanga*,” ùMwambilè cyà dyenza.

⁷⁸ Yesù wàkamba nè: “Panùdi nusambila, nùsambilàayi mùshindù ewu nè: “Taatu wetù Udi mu Dyulu, Dìna Dyèbè djjidiibwè. Bukalenge Bwèbè bulwe. Diswa dyèbè dyènzekè.” Nganyi, jandùlaayibi mwaba utùdi twenza nàнку awu's? Tudi misangu yònsò ànu tuswa bwà Mukalenge kutùnyeemena mbilu, anyi kutwènzela cintu kampàndà. Kàdi patùdi baswè kwamba nè: “Diswa Dyèbè dyènzekè,” tudilàmbula twètù biinè kùdiYe, tulàmbula njila yetù kùdiYe. Cyònsò citùdi aci, tucilàmbùlaayi kùdiYe. Apu mpiikalà Nzambì mwà kutentemuka, paudi muswè bwà kuMulekela ùkwàta mudimu pa wèwè, kì ngwèwè ukwàcila mudimu pa Yèyè nànsha.

⁷⁹ Yèyè àkwambilè, kì ngwèwè uMwambila nè ùcikònyangaja to. “Lwàkù ku ndongolwelu wetù, Éyì Mukalenge Nzambì, tùvwijèku twètù bônso ba-Méthodistes, twètù bônso beena Mpenta, kòòkeshà bakwàbò bônso. Tudi baswè muntu kampàndà wa meeji matwè, twètù beena Mpenta, twètù ba-Méthodistes nè ba-Baptistes.” Tudi nè maasèminèrè, twibaka yà minène menemene ayi, twamba nè: “Ndekeelu wa—wa cikondo ùkaadi pabwipi, Dilwa dyà Mukalenge,” baditwe mu kwibaka

sèminèrè yà yiyiila miliyô yà ndola, nè bikwàbò. Kuteeta kwenza cinyi? Kutùpetelakù maasiyà kampàndà. Ncyà bushùwà.

⁸⁰ Kàdi Mukalenge àjuulèbi cintu kampàndà mwaba kampàndà, dìnà dīngumba dyònsò didi didikèbela wadi wa mùshindù wùm>wùm>wùm>wùm awu. Aci's mmwômò menemene. Jandùlaayi's. Tàngilàayi nùmonè pààkatuutà dyondopa dyà kùdi Nzambi, mbúngi kaayi bwà bondopi bàà kùdi Nzambi bààkajuuka? Muntu nè muntu ùvwa nè cyà kwikala mwondopi wa kùdi Nzambi.

⁸¹ Kwàkapátuka ànu Mòsà umwèpelè mu matùkù awu. Kùvwa Eliyà umwèpelè, Elishà umwèpelè, Yeshàayi umwèpelè, nè bikwàbò.

⁸² Mpindyewu tudi tujandula nè bàà pa buloba mbaswè maasiyà wabò sungasunga. Russie mmuswè wendè, nè États-Unis mmuswè wendè, bukwantèdeleelu mbuswè wabò. Muntu yònsò mmuswè wendè maasiyà, kàdi mbamuswè mu mùshindù wùdìbo—wùdìbo mwà kumukòntonona. Mbaswè kwikala nè bukòntononyi pa maasiyà ewu. Kaa, bushùwà's. Èyowà, bôbò, bu nè bàvwakù mwà kwikala nendè's. Bu Nzambi mwà kumutùma mu ngumvwilù wabò sungasunga, bàvwa cyà bushùwà mwà kumwitaba. Kàdi nudi numòna's, díbà adi, Nzambi ùvwa mumanyè majinga àbò. Yèyè—Yèyè kí mmulayè bwà kutùtùmina bitùdi baswè nè bitùdi tulòmba to, kàdi bìdi bitùkèngela.

⁸³ Bàvwa baswè kalààlà kàà màsàlaayi; bààkapeta Mwànà wa mu dibòkò. Nwamònu's, ke civwà cibàkèngela ncyòci aci. Bìvwa bìbàkèngela mwànà wa mu dibòkò (cinyi?) bwà kubàpwekesha milongo, bwà kubàpwekesha.

⁸⁴ S'ke cidi cìkèngela èkèleeziyà wa mudyènzela leelù ewu, kudìpwekeshayè cyàkàbìdi. Mbikafikè mu mùshindù wà nè, kakwèna ditonda to nè kakwèna dinanga munkaci mwà bantu to. Mbimwèke ànu bu nè bìdi munkaci mwà kufwà ku ditùkù nè ku ditùkù. Èkèleeziyà ùdi munkaci mwà kukwàcika mashika. Myaba yònsò, nudi nusangana nè ditàbuluja ndijikè, nè nudi nusangana dikwàcika dyà mashikà dyà kacya. Bìdi bitùkèngela didìpwekesha. Nè tudi . . .

⁸⁵ Bààkalòmba kalààlà kàà màsàlaayi; kàdi bààkapeta Mwànà wa mùkòòkò. Bwà cinyi? Mbwena kwamba nè, Nzambi ùvwa mumanyè civwà cibàkèngela. Ke civwà cibàkèngelà aci's. Bàvwa dijinga nè Musùngidi. Bààkeela meeji nè bàvwa basùngidiibwe, kàdi Nzambi ùvwa mumanyè nè kabàvwa basùngidiibwe to.

⁸⁶ Nènkù ke cidi cìkèngelà bwà bàà pa buloba leelù ewu aci, cyàkàbìdi, m'Musùngidi, Musùngidi wa ngiikàdilù ewu, cintu kampàndà cidi mwà kubùlama pàmwè. Kí ndongolwelu kampàndà wa tùlaasà tulonga to, ndongolwelu kampàndà wa mulamakaja, anyi ndongolwelu kampàndà wa bulongeshanganyi to. Cidi citùkèngelà m'Bukolè bwà Mukalenge Yesù Kìlistò, nè ngàsà udi usùngila, mwalùkile

cyàkàbìdì mu èkèleeziyà, pàdì balùme, bakàjì, nsongàalùmè, nè nsongààkàjì, mwà kusungìdiibwa.

87 Tudi batàmbe kwindila ntàntà mule bikolè anyi? Kùdikù bààbúngì kuntwaku bìikalà kabàyìku mwà kubwela anyi? Dìna dya ndekeelu dikaadi dimanè kupikudiibwa anyi? Ke lutàtù lùdìku leelù ewu ndólù alu anyi? Bìdi mwà kwikala nàнку, nudi bamanyè's. Nudi bamanyè's, bìdi—bìdi mwà kwikala nàнку ànu bipeepèle, nè kabiyìku bicyàmakana Mifundu to, nànsha kakesè. Bìdi mwà kwikala nàнку. Pa nàнку, katwèna bamanyè mpindyewu to, tütabalelàayi's.

88 Kàdi bàvwa bèèla meeji nè bàvwa basungìdiibwe, nè— nè, kàdi Nzambì ùvwa mumanyè bímpè kutàmba mùvwàbo bamanyè. Kàdi's cintu cìmwècìmwè aci cìdi cyènzeka leelù ewu.

89 Bàvwa bangàte Dìyì divwà Nzambì mubàpèèshe bwà ditùkù adi adi, bwà nè bìvwa bikèngela kwikalabo bamanyè ditùkù divwàYe ùlwa, kàdi benze cilèlè kampàndà ku Dyòdi adi. Yesù wàkamba nè: “Nudi bangàte Dìyì dya Nzambì nè baDivwijè kadiyì nè bwenzeji to, ku bilèlè byènu abi.”

90 Ncintu cìmwècìmwè aci cìdi cyènzèke leelù ewu mu wetù ndongolwelu, ndongolwelu wa butèndeledi wa buloba. Ndongolwelu ya buloba mmyangàte Dìyì dya Nzambì nè miDivwijè dya cilèlè. Nènku's ke bwà cinyì Kadyèna nè bwenzeji mu Dyòdi to. Kakwèna cintu nànsha cìmwè cyàpàtukà mu Dyòdi to, bwalu n'Disopakaja dyònsò.

91 Kwèna mwà kutèeka ditalà dishùwashùwàle mu cintu kampàndà cìdi kaciyì mwà, ànu cyòci ciikàle buloba, cyanààna kadyàkutòloka to. Udi mwà kudyànyika mu muunya nè kudìlama nè luuya, udi mwà kwenza cyùdi muswè kwenza aci, kàdi bikèngela buloba bwà mùshindù kampàndà. Dìdi nè cyà kwikala mwòmò amu. Dìdi nè cyà kujiikiibwa. Dìdi nè cyà kwikala mu cyuyùya cijaalàme, bwà kuditòlwesha.

92 Nènku ke mùdi kàbìdì Dìyì dya Nzambì dyènta's! Kwèna mwà kwangata èkèleeziyà nè kumufikisha ku mwoyi, ku bilèlè kampàndà to. Udi mufwànyine kutwàla bidimba, mìliyò nè mìliyò, kàdi kwàkutwàlakù Bukolè bwà Nzambì to too nè patwàlukilà cyàkàbìdì ku Dìyì dya ku cibangidilu, twalukila ku Dìyì dya cishìmikidi, twalukila ku Mashì, twalukila ku— ku Yesù Kìlistò, twalukila ku masangisha à milòmbò à cyena kale, nè twalukila kùdi Nzambì's! Tudi mwà kwikala bayè kule bikolè, mpindyewu, mu mùshindù wà nè dîbà dikaadi diyè. Kàdi, nànsha nàнку, Èvànjeeliyò ùdi nè cyà kuyiishiibwa. Katwèna nè cyà kulumbulwisha aci to.

93 Nzambì ùvwa mumanyè cìvwàbo bàkèngela, ke Yèye kubàpèèsha cìvwà cibàkèngela. Pa nàнку kàbìdì, tudi tusangana, cìvwàbo benzè, tudi benzè cintu cìmwècìmwè aci.

94 Russie nè bakwàbò bônso abu mbaswè wabò. Nè beena maalu à mamanya bashiilèshiiàngane mbaswè kudyènzela dínà kampàndà dinène. Ditùnga nè ditùnga dyònsò didi dìjinga kupeta muntu wadi wa bwongò bwà meeji bu kapyà. Tudi baswè wetù twètù. Tudi baswè ndongolwelu wa bulongeshanganyi mwômò amu. Tudi baswè cyena-màngumba. Ke citùdi bapeté menemene ncyôci aci. Ke cyùdi wèwè mwenzè ncyôci aci. Ke cyúvwà muswè, ke cidi Nzambi mukupèeshe. Mpindyewu newikalè mwà kwenza naaci cinyi paanyimà pàà wèwè mumanè kucipeta?

95 Tudi twakula bwà Russie bwà kasunsa kakwàbò. Beena Russie bàdi munkaci mwà kukèba muntu udi mwà kucimuna cibwàshibwàshì. Bàdi bàbàlongesha nè lùkàsà lwònsò, beena maalu à mamanya bààbò abu. Kàdi bu bóbò mwà kumupeta, ambàâyibì túng bu bóbò mwà kupeta wabò maasiyà, citwènza ncinyi? Nè luse be bwètù twètù bu bóbò mwà kumupeta's! Vùlukàayi nè, Allemagne mmufùme ku dipeta maasiyà wa mùshindù awu ànu àbidi àdi panshì aa, Hitler. Kàdi's tudi bamanyè cyàkabenzelàci.

96 Mpindyewu bìshi bwà èkèleeziyà, m'maasiyà wa mùshindù kaayi udi èkèleeziyà mwindile, leelù ewu's? Wèwè, èkèleeziyà, udi mwele lubilà lwà díyi dikolè ditámbe. Nàнку, citùdi twelela mbilà bwà maasiyà kampàndà, citùdi twelela mbilà ncinyi's? "Ditabuluja mu cikondo cyètù! Alujaayi *cikampàndà*, *cikansanga*, nè *cikankènga*." Cidibo bindile ncinyi, bwà kucyènza? Ncinyi cikwàbò cinùdi baswè? Èkèleeziyà ùdi ùkèba cinyi's, twamb'eku twamb'eku?

97 Tukàadi bamanè kuMupeta! Nzambi ngudi mutùpèesheYè. Mmulayi Wèndè bwà díbà edi. Tudi tutàngila mu Bible, tudi tucimona myaba yònsò mu Bible mujimà. Balaaba maanyi kulwabo nè kuvwija Díyi adi nè mwoyi cyàkàbidi, ànu pa díbà mene bwà díbà adi. Kàdi's tudi nè Maasiyà awu. Ewu's n'Yèyè, Díyi! "Ku cibangidilu kwàkadi Díyi, nè Díyi dyàkadi nè Nzambi, nè Díyi dyàkadi Nzambi." Nè Díyi didi dishàala ànu Nzambi, Ebèlù 13.8: "Umwèumwè awu makèèlèlè, leelù, too nè kashidi." Tudi bamanyè cidi nè cyà kwenzeka mu ditùkù edi. Twètù tudi tujinga Maasiyà kampàndà. Nè Nzambi kutùpaYè Maasiyà awu, Díyi Dyèndè dilaya bwà ditùkù edi. Ndindile ànu bwà muntu kampàndà udi nè diitabuujà, bwà kuDìlaaba nè kuDìvwija nè mwoyi cyàkàbidi. Èyowà's, mukalenge. M'Maasiyà mulelèlè, N'Díyi dyà Nzambi. Pààbì, Yesù wàkamba nè: "Maulu nè buloba byònsò bibidi nebijiminè, kàdi Díyi Dyànyi kadyàkujiminakù to."

98 Kàdi èkèleeziyà mmusòmbe mufwè mu nyumà, muyè, díbà ndimanè kubàpita. Mbadyupwile mu tulu tukolè, nè lutàtu lukolè bwà kumanya cyà dyenza, ewu ùnyeemena *elu* luseke nè mukwàbò *lwàlwa* luseke. Kàdi mwab'ewu mulayi wònsò wùdi Nzambi mwenze mu Bible, wònsò wà ku yòyi, wùdi ànu

mwaba awu bîmpè menemene ànu mwàkadibo kacya amu. Dìbà ndyòdi edi's! Cìdì cìvwijà èkèleeziyà mùshindù ewu ncinyi? Tudi mu cikondo cyà Laòdikiyà, pàdibi bikèngela bwà kulwilabì mùshindù ewu. Dìbà ndyòdi edi bwà cyòci aci.

⁹⁹ Kàdi vùlukàayi nè, mwômò amu ke dìbà dyàkalwà virgò mukùtākāne awu bwà kusumba Maanyi, nè òvwā ndìbà òvwēdimwē dyàkalwà Mubāki adi. Tudi tusangana leelù ewu nè, ba-Épiscopaliens, ba-Presbytériens, nè mǎngumba mashìilèshìilàngāne, nè, kùkaadi ndambù wa bidimu, kùvwakù nǎnsa mwà kubáfuta bwà kuseemenabò pabwìpi nè musumbà wà beena kwitabuuja bàà cyena Mpenta to. Nǎnsa kakesè. Kàdi's ke bóbò abu, leelù ewu, bàbwela. Kanwènaayikù bamanyè cyākambà Yesù anyi? Bàākabwela bwà kusumba Maanyi, nè kwambabò nè: “Tùpèèshaayikù ndambù wa Maanyi ènù awu.” Aba bàvwà nè Maanyi abu, bàākamba nè: “Kabyèna nǎnku to. Ndàayi nùkaÀsùmbè, bwà . . . kùdi aba bàdi bàÀsùmbishà.” Nènku pàvwàbò bàteeta bwà kuÀsùmba, pàvwàbò bàteeta bwà kuÀpeta apu! Nudi bamanyè dìbà ditùdi nè mwoyi edi anyi, nwènù beena Mpenta? Pàdibo bàlwa, bàvwā bafwànyine kubwela mu cibwejàkàjì, bàvwā bafwànyine kwikala benzè *cikampàndà*, *cikansanga*, anyi *cikankènga*; kàdi, bilondèshile Mifùndu, kabàākaÀpeta to. Pàvwàbò bàteeta bwà kucyènzā apu, bàvwā bafwànyine kwikala bapicìle mu masaluka ònsò awu, nè pashìishe mu tusùmbù twònsò nè masaluka, kàdi dyabùlù ùdi mwà kutentula bintu byònsò abi. Pàvwàbò bàÀsùmba apu, anyi bàteeta bwà kuÀpeta, Mubāki kulwa, nè aba bàvwà nè Maanyi kubwelabò.

¹⁰⁰ Nènku's ke dìbà ditùdi nè mwoyi ndyòdi adi. Katùtùkù banjì kucimòna kwònsò eku to. Yesù wākamba nè bìvwā mwà kwikala nǎnku, dìbà adi's ke mùdibi! Citùdi munkacì mwà kumòna ncinyi? Tudi munkacì mwà kumòna Dìyi, dyākamba Nzambi nè nedyènzekè mu ditùkù edi, dyènzeka ànu mwìsù mwètù mene. “Kaa, dìbà adi tàbulukàayi, nwènù bansantu bàà Mukalenge, bwà cinyi kubùnga nè tulù pàdi ndekeelu wènda ùseemena apa; tùdìlongòlòlaayi bwà dibìikila dyà ndekeelu adi,” bwalu katwèna bamanyè dìbà òikalàdi to. Èyowà.

¹⁰¹ Ndongolwelu wetù wa buloba, ndongolwelu wetù wa èkèleeziyà, ndongolwelu wetù wa cyena-mǎngumba, ndongolwelu yetù yònsò, mmikooyike nè minyangùke. Citùdi bapangile leelù ewu ke cyàkadibo naaci makèèlèlè. Ncyà bushùwà. Bìdi bìmweka bu dyuminyina, mu maèkèleeziyà, bikolè menemene bwà kupetaku kàbìdì èkèleeziyà udi nè mwoyi nè Dìyi nè mwikāle nè Nyumà wa Nzambi, nè bintu binène munkacì mwà kwenzeka mwàkadibi matùkù mashàāle aa.

¹⁰² Mpindyewu, tudi tusangana nè Nzambi mmumanyè cìvwàbò naaci dijinga, pa nǎnku Yèyè—Yèyè ùtu misangu yònsò ànu wàdamuna mulayi. Cìdì ànu Dìyi dinène ditùdi tumòna edi, mulayi, s' bìvwā bikèngela kwikalabò bamanyè nè cìvwā

menemene ànu cìvwà Nzambì mulayè, ke cìvwa mwà kwenzeka mu ditùkù adi.

Wèwè udi wamba nè: “Mmunyi, ncinyi cìvwà nè cyà kwenzeka?”

¹⁰³ Yeshàayi 9.6, mupròfeta wàkamba nè: “Mbatùlelèlè Mwànà, Mwànà wa balùme, Mwànà; Mwànà wa balùme mmulediibwe, Mwànà mmupèèshìibwe: nè Dìnà Dyèndè nedibìikidiibwè nè ‘Mubedyanganyi, Mfùmù wa Ditalala, Nzambì wa Bukolè, Taatù wa Kashidi’; nè bukalenge nebwikalè pa makaaya Èndè, nè bwà Bukalenge Bwendè kabwàkwikala nè ndekeelu to.”

¹⁰⁴ Tudi bamanyè nè bìvwa bikèngela bwà twètù kwikala nè Mwànà mulela mu ditùkù adi, bìvwa bikèngela bwà virgò kwimitayè difù nè kulela Mwànà. Nè Dyòdi kadìvwakù dipicile mu ndongolwelu yàbò ayi to, ki bwà cinyi kabàakaswà bwà kwikala naaDi bwalu nànsha bùmwe to. BàakaDibènga. Kàdi Dìyi dilaaba, Nzambì (Èmanùwèlè) muvwijìibwe mubidi munkaci mwàbò, mwimàne mwaba awu, Yèyè kwamba nè: “Nganyi wa kunùdi udikù mwà kuMbanda bwà mpèkaatù, bupidyà? Kenkètaayi Mifundu, bwalu mu yòyi amu mmunùdi nwela meeji nè nudi nè Mwoyi wà Cyendèlèlè, kàdi yòyi ayi’s ke yidi yìMfidila bujaadiki.” Wàkamanyishiibwa ànu menemene nè Yèyè nguvwa Maasiyà awu, Maasiyà uvwa nè cyà kumata mu cyalu mu ditùkù adi. Nè ndongolwelu yìvwa—yìvwa minyangàkàje meeji à bantu, mu tunungu twà ndongolwelu búngitù, nè bikwàbò, mu mùshindù wà nè bàakavwija Dìyi dyà Nzambì kadìyi nè bwenzeji to. Kabàvwa mwà kumòna nè Yèyè nguvwa Maasiyà awu to.

¹⁰⁵ Nènkù ànu mwàkacyènzàci musangu awu amu, ke mùdici cicyenze kàbidi. Èyo. Ndongolwelu yà buloba, byamu bilamakaja, bàdi nè pistons mwaba wùvwa—mwaba wùvwa mpompì wa lupeepa nè cyà kwikala, mu byamu byàbò binène bilamakaja abi. Kàdi’s ki bwà cinyi mmunyi mùdici mwà kunyeema lùbilu? Kacyèna mwà kucyèna to. Kacivwa ciibaka mùshindù awu to.

¹⁰⁶ Èkèleeziyà kèna mwà kuya kumpàlà kakùyì Bukolè bwà Nzambì to, ku Dìyi. Nè Nyumà Mwimpè neàshindikè ànu Dìyi dyà Nzambì nkààyaadi, bwalu ke cidiYe nè cyà kwenza ncyòci aci. Dilaabiibwa didi mbwà kushindika Dìyi.

¹⁰⁷ Kàdi’s Yesù nguvwa Mwela maanyi awu, Dìyi divwijìibwe mubidi. Ke bwà cinyi Wàkabwela mu màyi amu, Yèyè uvwa Dìyi dilwa kùdi mupròfeta. Wàkabàtiijìibwa kùdi mupròfeta. Ke mupròfeta awu kujuukayè pashìishe, è kwamba nè: “Ndi nè cyà kupweka; Yèyè neàbandè.” Tudi tusangana nè ke mùshindù wà Nzambì wà dicyèna ngwòwò awu.

¹⁰⁸ Kàdi bààkaDyàkidila anyi? Bìvwa bikèngela kwikalabò baDìmanyè. Bìvwa bikèngela kwikalabò batàngile byenzedi byà Nzambì. Bàakamòna Dìyi dyùle. Bàvwa bamanyè nè Mifundu

mmyâmbè cyôci aci, kàdi kabàvwa mwà kwitabuuja nè neDilwe mùshindù awu to. Dìvwa nè cyà kulwa anyi kùdi Bàfaalèsà peeshi Bàsadòkà. Bu nè Dìvwa dilwè kùdi Bàfaalèsà, Bàsadòkà kabàvwa bafwànyine kwikala baDyakidile to. Aba anyi aba, Bà—Bàsadòkà kabàvwa mwà kuDyàkidila to, bwalu bàvwa bàmba nè Bàfaalèsà bàvwa mwà kwikala naaDi.

109 Nènku's mùshindù awu ngùdìbi leelù ewu, ndongolwelu yètù, nè cintu cyònsò mu kaabujimà cikaadi cibolè nè cyonèke. Kaa, ekèlekèle! Dìbà ditùdi nè mwoyi mpindyewu edi, bàà pa buloba bafofomija, bendela mu mîdimà, bakònamija mu ndongolwelu yà pa buloba ebu, bu mikòòkò kayiyi nè mulami wa mikòòkò to. Pàdìbo nè Dìyi dya Nzambi udi nè mwoyi dishindika kumpàlà kwàbò, kàdi bàkwàta njila bàya mu bufofo, nè kuDìshìya, mmunyi mùdiku mwà kutèkemena cingà cintu's? Amen. Ki bwalu mbwòbù abu's.

110 Dìbà adi's, buloba bùdi munkacì mwà kudìshìnda. Bwà cinyi? Dìyi mene didi dibùswike pàmwè ndibèngiibwe. Tudi tusangana aci mu Ebèlù, nshapità wa 11.

111 Einstein kwambayè, mvwa munkacì mwà kutèeleja cisangilu cyèndè mwab'ewu dilòòlò adi, mu New York City, mwàkenzàye cimwè cyà ku bisangilu byèndè byà ndekeelu, ùvwa wàkula bwà nsangilu wa mitootò, kasumbù kakesè kàà mabùlunga lwà mu nsangilu wa mitootò amu, yèyè nè: "Muntu yèyè ànu mubwele mu cibwàshibwàshì, wènzà lwendu mu lubilu lwà bukènkè..." Ncinyi aci, binunu mwandamukùlù...? [Muntu kampànda ùdi wamba nè: "Binunu lukàmà nè makùmi mwandamukùlù nè bisambòmbò."—Muf.] Kìlòmèètà binunu nkàmà yìbidì makùmi citèemà nè mwandamutèkètè nè nkàmà yisambòmbò ku kasùnsukilà kàà kasunsa. "Mbifwànyine kumwangata lukàmà, kumwangata mìliyò lukàmà nè makùmi àtaanu à bidimu byà bukènkè bwà kufika kuntwaku." Ùvwa mupetè Cyèndèlèlè. Pashìishe kwamba nè: "Bwà kwalukila, bìvwa mwà kumwangata mikwàbò mìliyò lukàmà nè makùmi àtaanu yà bidimu byà bukènkè, yìvwa mìfwànyine kwikala bidimu mìliyò nkàmà yisàtù. Nè cipòòlù, cìvwa yè muumùke pa buloba aci, cìvwa ànu cìfwànyine kwikala bidimu makùmi àtaanu cyanààna." Ki bwalu mbwòbù abu's, mubwayike mu Cyèndèlèlè! Kaa, ekèlekèle! Bunène bwà Nzambi, pààkenzàYè ndongolwelu mujimà wa mabùlunga apu's wè!

112 Nènku mubàndi wa mu mabùlunga ewu, ditùkù adi, ùbùuka eku nè eku kwà Russie, nè kwambayè nè yèyè "kàvwa mumòne Nzambi nànsha, Banjèlò to." Mùshindù mwinè wùdi bantu mwà kwikala bapangi's wè! Pàdìbi nè. . .

113 Nzambi's! Nè ndongolwelu mujimà wa mabùlunga, Yèyè wàkamwelela mupùuya mu byanza Byèndè; nè Yèyè mmusòmbe bidimu byàbùngì mùliyò mujimà, bidimu byà bukènkè, bipite apu. Nè cintu cyònsò mu kaabujimà ncikwata kùdi Bukolè

Bwèndè nè Diyì Dyèndè. Àlèluuyàh! Mùtootò wònsò wùdi nè cyà kulembelela pa kaaba kààwù. Èyowà's, mukalenge! Dìbà adi, ùvwa mupwekelè bikolè bwà kupwekelela nè kuvwijiibwa umwe wa ku twètù, bwà kutùfwila; katwèna nè pàà kumbingila to. Bu byòbì mwà kwenzeka nè wùmwè wà ku mitootò ayi wùumukè mu bimpòkòmpòkò byàwù, wùmukila mu cijèngù cyàwù mùdiwu amu, bu cyòci mwà kunyunga, ncifwànyìne kwikala nè bwenzeji pa ndongolwelu yònsò mu kaabujimà. Ndongolwelu mujimà udi nè cyà kunyùnguluka ànu mùshindù wùmwèwùmwè menemene, bwalu ewu mmwèyèmèna mukwàbò.

114 Nènku ndongolwelu wa Nzambi, pàdiyì mu dipetangana Nèndè mu mùshindù mupwàngàne, cintu cyònsò mu kaabujimà cìdi cìkwàta mudimu bipwàngàne. Ncyà bushùwà, bwalu cìdi nè cyà kwenza nàнку.

115 Kàdi èkèleeziyà kààkangatakù ndongolwelu wa Nzambi to, wàkadyènzela ndongolwelu wèndè nkààyèndè. Ke bwà cinyi katwèna bònsò mu dipetangana to. Ke bwà cinyi èkèleeziyà ùdi mu cimvundù cyà dikemà. Ke bwà cinyi buloba bùdi munkaci mwà kudishinda leelù ewu, bwalu tudi basungùle ndongolwelu yètù sungasunga. Ki bwà cinyi maalù à cididi mmadishinde. Ke bwà cinyi bukwàntèdeleelu mbudishinde, mbwalu tudi bangate ndongolwelu kampànda pamutù pàà kwangata ndongamu wa Cyendèlèlèlè wa Nzambi bwà bikondo. Amen. Ke lutàtù lùdiku nè bàà pa buloba ndwòlò alu. Ke cyòci aci menemene cìdi cibi, mbwalu mbangate cintu kampànda cikwàbò. Mbifikishe bantu ku ditàma kwikala nè: "Mémè ndi Presbytérien. Ndi Méthodiste. Ndi Unitaire. Ndi Trinitaire. Ndi . . ." Kaa, luse's wè! Kabyèna bikèmesha to mutùdi katùyì mwà kushààla bakwàtàngàne, kakwèna cintu nànsha cimwè bwà kutùlama bakwàtàngàne pàmwè to.

116 Mukalenge Nixon wàkamba bwalu bwà lungènyi lutwè bûnkaadiku mûmvwe mfùmù wa ditùnga anyi cindondà mwakùle mu bidimu bikesè bishààle ebi, pàakambàye ditùkù adi nè: "Mbwalu kaayi ebu nè beena Àmèrikè's, mbajimije dinanga nè kaneemu bwà muntu nè mukwèndè." Pàdi beena ntanda bàà beena Àmèrikè munkaci mwà kushebeyangana ku cingoma muntu nè mukwèndè, mu mùsèsèsù, tudi mwà kucyènta munyì? Èkèlekèlè!

117 Wèwè kùyì mwà kupangakana nè muntu, kàdi kumunanga musangu wùmwèwùmwè awu to, nènku ùkangà mukana. Wèwè kùyì mwà kumwambila, mùdi papa ùlongolola mwanèndè mulela, nè dibòkò dijinga bwà kumujiingila ku nshingù nè kumwela mu citupà pashishe, uvwa kwenza bimpè bwà kumulekela kwà tálàlà. Kwèna mwanji kuya ntàntà mukumbàne to, wèwè mwinè, bwà kumanya cyùdi wamba aci. Cyà bushùwà. Ndi mwà kupangakana nè muntu kampànda, cyà bushùwà; ùcidi ànu mwanètù, nèmmukwàte ku cyanza. Ncyèna mwà kumulekela mu cintu aci to; mémè mwenze nàнку, mémè

nciyi mumwambile, ncyèna mwà kwikala mwanààbò mujaalàme kùdiye to. Aci mmwòmò. Kàdi ndi mwà kumwambila, nè kumwambila nè ndi mumunangè, nè kumujaadikilaci nè, ndi mumunangè.

¹¹⁸ Kabyèna bikèngela bwà wèwè kumwasa cingoma, mu mùsèèsù to. Ntu mpangakana nè Mukalenge Kennedy nè—nè cidiidi cyèndè, nè ntèndeleeu wèndè, nè bikwàbò, kàdi kàvwa mukùmbànyine aci to. To, mukalenge. To, nànsha kakesè. Muntu nànsha umwe kèna ùkùmbanyina aci to.

¹¹⁹ Pa nànkù, tudi tusangana nè buloba bujimà mbunyangùke. Ditùngà dyètù, cidiidi, ndongolwelu yà ntèndeleeu, nè bikwàbò byònsò, mbinyangùke.

¹²⁰ Bidi ànu munkaci mwà kwindila cyanààna. Dìyi dyà Nzambi, òvwa dyambiibwe mu cipròfeta bwà ditùkù edi adi, ndindila bwà muntu kampàndà kulwayè kuDishindika. Ndi ndikonka Yèyè ní ùkaadi mumanè kucyènza? Nànkù tudi penyì dîbà adi piikalàbi nè Yèyè ùkaadi mucyènze? PiikalàYe mucyènze, dîbà adi tudi penyì? Batàmbe kukwàta ne byà luse's!

¹²¹ Mvwa mwambè cintu kampàndà cikolè bwà Mándàmù Kennedy, misangu bu yìbidi, pa bìdi bitàngilà mùdiye ùlejeja bàà pa buloba myòdelè, nè cisuba cyà nsukì mikòsa eyi, nè “Mùshindù mwinè wùdi bàna bèètù bàà bakàji nè bakwàbò bàkosa nsukì yàbò, nè balwàta bu Mándàmù Kennedy,” Mémè nè: “bu Izàbèlà wa kale awu.” Aci's ncilelèlà. Ndi ngùtabuuja nànkù. Ndi—ndi—ndi ngùumvwila maamù mukesè awu luse dilòlò edi, nè bàna bèndè abu, ànu menemene.

¹²² Kàdi lekèlaayi nnùkonkèku cintu kampàndà. Bu Jacqueline Kennedy mwà kwikala muumvwè Mayiisha àdi bàmwè bàà kunùdi nwènù beena Mpenta bùumvwe, pa bìdi bitàngilà dibebula dyà nsukì yènù nè bikwàbò, yèyè kàvwa mene mufwànyine kwikala mubèbùle nsukì to. Nwènù's nudi bamanya nè nudi beena mpenta, kàdi's nucidi ànu nucyènza's! Uh-huh. Uh-huh. Yèyè mmufwànyine kubenga kucyènza bu yèyè mwà kwikala mupetè mpùngà nè muumvwe Mukenji, nwamònu's, nwènù nukàadi bumvwè's. Ki bwalu mbwòbù abu's. Tudi mu mwaba mubi, balùmyànà wa yààya. Aci's ncyà bushùwà menemene. Èyowà's, mmwòmò. Eyi Nzambi, mùshindù mwinè wùdi maalu à nsòmbelu mulenga, cintu aci . . .

¹²³ Bukàji ncimwè cyà ku bintu bìdi bilama ditùngà dyètù kaaba kàmwè. Ke mufùba wà mwongo. Nènku bukàji, bukolè bwìmpè bùdi Nzambi mupèèshe mukàji bwà kwikalayè maamù abu, mòna's, bùdi—bùdi—mbuyè. Kùkaadi ntàntà mule bàkaadi—bàkaadi—ba—bakàji bàà pa buloba ebu, ngikàdilù wabò wa bukezùke, ùkaadi mwìnàmìne nzambi mukàji wa cyena Hollywood; bàtentula, nè bàvwàla, nè bènta maalu bu mùdi bàmwè bàà ku balùmyànà bende luumù bàà mu Hollywood aba benza amu. Nè kùdi misangu yàbùngì yìdi mene

cyàkatèèkiibwa mwaba ewu bwà buloba kunyùngulukilapù aci, Cintu mene civwà ndongolwelu nè bikwàbò byònsò nè cyà kunyùngulukilakù aci, Dìyì edi, kwàkafwìmbilà Nzambì, buloba. Einstein wàkamba mu wendè, wàmba nè: “Kùdi dyumvwija ànu òm̀wèpèlè dyà Mifùndu... Dyumvwija ànu òm̀wèpèlè bwà buloba ebu kwikalabùku,” mwàkambàye, “ng’Ebèlù 11: ‘Ku diitabuuja tudi tuumvwa Dìyì dyà... ku Dìyì dyà Nzambì nè, maloba àkafwìmbiibwa pàmwè kùdi Dìyì dyà Nzambì.’” Kwàjiki. Kakwèna muntu nànsha umwe udi mwà kwamba mùdìbu bulembèlèle kwàka mu lupeepèlè to, nè mùshindù wùdìbu mwà kunyùngulukila nè kwenza mèbà àbù makùmi àbìdì nè ànaayi bùnyùngulukila mushoonyi wà équateur awu, nè bikwàbò mùshindù awu, nè mu nyungulukilu wa cijèngù cyàbù, myaba yònsò, nè kwalukila pa kaaba kàmwèkàmwè nè kabùyìku mwà kupangila kasunsa kàmwè to. Nè dìnà mùtootò wònsò wùnyùngulukila mu wawù njila mùshindù awu, nè yènda yìkwàcishangana pàdìyì munkaci mwà kunyùngulukila apu.

¹²⁹ Mùshindù mene wùdi ngondo awu ùkòntonona mbù kuntwaku’s! Ngondo awu yéyè ànu mudìngè mupàtùke mu mwaba wèndè, tudi bafwànyìne kwikala babwikidija kùdi màyi mu bule bwà metèlè makùmi àsàtù majimà, ànu mu kasùnsukilà kàa kasunsa, anyì túbìdì cyanàànà. Ngondo awu’s! Tàngilàayi, nudi mene mwà kumbula ciina mwab’ewu, nwènu bàtù bumbula kàsòloonyi abu, kumbula mwab’ewu. Nudi numòna mùshindù wùdi mwelelu wà mbù kule neenù anyì? Nudi numbula ciinà mu buloba emu mwab’ewu, kàdi nutàngila mu dìbà dyà dilòòlò, mùdì diwala dyà màyi à mbù dibwelamù, necipàtule màyi mu lubungu lwènu amu, màyi ènù à mukèlè awu. Cyà bushùwà’s. Ncinyì aci? Ngondo awu ùdi ùkòntonona, kwàka nàka.

¹³⁰ Ndongolwelu wa Nzambì. Ndongamu wa Nzambì. Ndiyi ditùma dyà Nzambì. Kàdi, tudi tudyènzela dyètù twètù nkààyeetù, katwèna twangata Dyèndè Yéyè to. Tùlwijakajàayi mpindyewu, bwà kujikija. Ànu mùvwàbì cikondo aci, mbyà mwòmùmwè nè mu Noël ewu, tudi tusangana nè buloba bwètù bùdi munkaci mwà kudishinda. Kaa!

¹³¹ Nzambì wàkeediibwa maanyi, nè Wàkalaya Dìyì Dyèndè. Yéyè wàkatùlaaba maanyi kwàwa, nè kutwàmbila Yè, kubàmbila nè: “Pààkeelàye Yesù Kìlistò maanyi apu...” Peetèlò wàkamba mu Ditùkù dyà Mpenta, wàkamba nè: “Yesù Kìlistò, Muntu mwanyishìbwe kùdi Nzambì munkaci mwènu ku bimanyinu nè maalu à kukèma, cyàkenzàYe munkaci mwènu aci; nwènu biinè nudi bamanyè’s.” Bòbò’s mbantèmù. Kàbìdì mmwambè nè: “Paanyimà pàa dibìlkà dyà ku lufù, nè bikwàbò, mwàkenzàYe amu’s! Mùshindù mwinè wunùdì nè byanza byà cikisu bakwàte Mfùmù wa Mwoyi nè bapoopèle pa nkùrusè, Yéyè udi Nzambì mubiishe ku lufù awu; nè twètù tudi bantèmù.” Mùshindù wàkalwà Nìkòdemè kwamba nè: “Laabì, tudi bamanyè. Twètù Bàfaalèsà, Tubàdì tukùlù twà beena Yudà kuntu kwàka, tudi

bamanyè nè Wèwè udi Mulongeshi mutùma kùdi Nzambì. Muntu nànsha umwe kèna mwà kwenza bintu byùdi Wèwè wenza ebi to ànu byôbi biikàle byà kùdi Nzambì.” Bàvwa bamanyè nè mulayì awu wùvwa bwà kuntwaku, nè bàvwa bamanyè nè wùvwakù, kàdi ndongolwelu yàbò yìvwa mibàswiike bikolè mu mùshindù wà kabàyiku mwà kwenza kantu nànsha kàmwè pa bwalu abu to.

¹³² Ke mùdibi kàbìdi leelù ewu, cintu ànu cyôci cimwècimwè aci. Kwèna mwà kucyènza to, neùlekelè kartà kèèbè kàà buumambàlà aku ànu musangu wà kumpàlà wùdi ucyènza awu’s. Fùnda wèwè ànu mwaba awu pa Dìyì dyà Nzambì adi musangu kampàndà, kàdi ùmòne cidì cyènzeka; kwèbè nkujike. Kwàkwikala munangìibwe to. Newipaciibwè munkaci mwàbò, nè bikwàbò byònsò.

¹³³ Kaa, wèwè nè mudimu mukèsè wà bwambi, nebàkulamè bwà mfranga yidìbo mwà kupeta ayi, kubàkungwijila musùmbà wà bantu ku mudimu wèbè wà bwambi awu, kubàkokela mfrangà nè bikwàbò. Kàdi tàngilàayi ànu nùmonè pàkaadìbi bikafika ku Dìyì, bàtàngilàayi nùmonè mùdibo bààluka paanyimà bàciina Cyôci aci. Nudi nwela meeji nè musadidi wa Nzambì kí mmumanyè aci anyi? Èè, Yesù’s ùvwa mene mumanyè nè Yudààsà ùvwa munkaci Mwèndè. Yesù kàakambilakù Yudààsà cintu kampàndà bwà cinyi? Kabingilà kàmwèkàmwè aku kàdiku leelù ewu, bikèngela windilè too nè pààlwà dìbà adi bwà diseeswishangana adi. Ncyà bushùwà. Bàdi naaci. Nebàcipetè.

¹³⁴ Mònaayi’s, kàdi kabàvwa baswè mùshindù wàkalwàYe awu nànsha, ke mùdibi kàbìdi leelù ewu. Maèkèleeziyà dìbà adi àvwa àjinga bwà ndongolwelu yàbò kulaabiibwayi maanyi. Bàfaalèsà bàvwa bàjinga bwà ndongolwelu wa Cifaalèsà kulaabiibwaye maanyi, Basadòkà bàvwa bàjinga ndongolwelu wa Bàsadòkà awu, beena Helòdè pààbò, nè bikwàbò. Ke mùshindù wùdibi leelù ewu. Bu bòbò mwà. . . Bu Nzambì mwà kutùma dilaabiibwa, nè kulaaba ba-Unitaires maanyi, kaa, ekèlekèle, kí mbafwànyinekù kwambila ba-Binitaires bwalu abu, anyi ba-Trinitaires, anyi cyònsò cidìci aci anyi? Beena Assemblées kabàvwakù bafwànyine kwambila ba-Unitaires cyôci aci anyi? “Mémè’s mvwa munwàmbile nè tuvwa mu bulelèlà!” Ba-Méthodistes’s bàvwa bafwànyine kwambila ba-Baptistes nè: “Éyì balùmyànà wa yààyà, nwamònu’s, twètù’s kí bàdi nè cintu!” Nudi nujinga bwà ndongolwelu wenù àlaabiibwa maanyi.

¹³⁵ Kàdi Nzambì mmulayè ànu bwà kulaaba Dìyì Dyèndè maanyi. Amen! Ndi mumanyè nè aci cidì cyòsha, kàdi’s ke cidì Bulelèlà ncyôci aci. Nzambì kàtu ùshintulukakù to. Ùtu ùlaaba Dìyì Dyèndè maanyi. Èyowà’s, mukalenge. Dìyì dilaaba, dilaya bwà cikondo aci ke didì Nzambì ùlaaba. Dìyì dilaya bwà cikondo aci’s!

136 Leelù ewu mbaswè ndongolwelu wa dilonga dyà tùlaasà, (bwà cinyi?) bwà bààmòna mwà kwenza cintu kanà cyònsò cidìbo baswè kwenza aci, kàdi kutùngunuka ànu nè kulama ditonda dyàbò dyà bwena Kilistò adi. Kaa, bôbò nè cintu kampànda cinène cyà menemene, mùdì mwà kubwela, kupweka nè milongo, nè bikwàbò, nè kucyànkunya bàzòkà, nè—nè kwafunyangana; nè kupàtuka nè kwikala nè bibambalu byà diikisha nè bikwàbò, kunùdì bònsò nuya bwà kunaya ndundu wa dyela mu tubòndo nè bikwàbò byà mùshindù awu's. Ncyèna nè bwalu nànsha bùmwe nè ndundu yà kwela mu tubòndo, ndundu yà tubwengà, ndundu yà makàsà, anyi ní ncinyi cyònsò cidìci aci to, cyà cinène. . . piikalàci ke webè nzambì yònsò, cidì ànu ncifukufuku cinène cyà lupeepèlè. Kàdi lekèlaayi nzwàmbilèku, cidì citùkèngelà leelù ewu n'Diyi dyà Nzambi, dilaaba bwà cikondo eci, diikalà mwà kupàtula cyàkàbìdì Bukolè bwà Nyumà Mwimpè. Èyo, bikwàbò abi mbimpè, kàdi abi kì mbya mu èkèleeziyà to. To, mukalenge. Bikèngela wibakè cintu kampànda cyà mùshindù awu, bwà kulama èkèleeziyà pàmwè, bìvwa bitàmbe bwimpè wèwè kumwosha anyi kumwela pambèlu, anyi kubwejamù cintu kampànda ciikala mwà kwaluja Diyì adi cyàkàbìdì. Nènkù ke bintu byà pa buloba mbyòbì abi, kaa, kubisambakaja nè Diyì dyà Nzambi, kwèna mwà kucyenzaku to. To, mukalenge.

137 Èyowà's, mukalenge, mpindyewu bôbò mbaswè ndongolwelu kampànda. Bàà pa buloba nebàngatè ndongolwelu kampànda. Mpindyewu tudì tusangana nè, ndongolwelu mukesè yònsò mu wèndè mùshindù, yònsò wa kùdiyì ùdì wàmba nè: “Ndi muswè bwà Àlwe kùndì mèmè. Ndi muswè bwà Àlwe ku wanyi mèmè.” Kaa, bàdi munkacì mwà kupeta màshinyi manène, nè bàlongesha bayiishi, nè bintu byà mùshindù awu, nè kubàpàtula, kubàtooyisha, balùmnyànà wa yààyà, nè byà meeji à mu mitù; mu mùshindù wà nè, èkèlekèle, mukwàcikwètù ùmvwa nè myàkù yèndè, mwakulu wèndè, mbibì bikolè, kàyì nànsha witaba bwà kupita mu cyambilu paanyimà pàà umwe to. Kàdi citùdì tukèngela leelù ewu kì ndongolwelu wa dilonga dyà tùlaasà to, kì mmalongesha mabala to.

138 Cidì citùkèngelà leelù ewu ng'Èvànjeeliyò mwambula kùdì Bukolè bwà Nzambi, bwà kushìndika Diyì dyà dìbà edi, mwaba wàlwà muntu kampànda wíkala mwà kujuuka kàdi kubiikila cifiike nè “ncifiike,” nè citòòke nè “ncitòòke,” muntu kampànda wàjuuka kàdi kwamba Bulelèlà, nànsha dikooshè anyi dikupòpòle masàlà, anyi cyònsò cyènzàDi aci. Ke cyòci aci menemene cidì—cidì dìbà edi dilòmba, leelù ewu.

139 Kàdi bantu mbaswè cintu kampànda. Bantu leelù ewu, bakàji, cidìbo bàjinga ncinyi? Mbaswè bwà ba—ba—cisàmbà, mpaasàtà, wíkala mwà kujuuka kwamba nè: “Mbimpè. Udi mwà kwenza *cikampànda*, anyi kwenza *cikansanga*. Anyi, abi's mbimpè, kakwèna bwalu bubì mu biinè *abi* to, munanga wanyi.” Muiishi awu ùdì ùkèngela mfimbù wa Èvànjeeliyò; ùlekela

nsuki mibebula ayi, dilaaba dyà bilaabu byà kwísù.

To, wêwè udi wamba nè: “Aci cìdi nè bwalu kaayi bwà dyenza naaCi?”

¹⁴⁰ Kwèna mumanyè nè mmwènekèlu webè wa pambèlu wùdi wùleeja cìdi munda anyi? Bible kèna wàmbakù nè kabivwa bikèngela bwà wêwè kwenza nànkù anyi? “Kí mbìmpè mene bwà muntu mukàjì kusambilayè mùshindù awu to.”

¹⁴¹ Nè wêwè mulùme udi muswè cintu bu nànkù anyi? Nwènu bayiishi, kanwèna mwà kucyàmba to, bwalu nenùlekelè kartà kèènu kàà buumambàlà aku, nsangilu munène awu neàkwipàte wêwè mwàmbe cintu kampàndà pa bwalu abu. Nzambi àkwacishèku muntu udi mufwànyìne kutàmba kwelangana meeji pa kartà kàà nsangilu anyi kartà kàà buumambàlà kutàmba mùvwàye mufwànyìne kwela meeji bwà dibàtiiza dyà Nyumà Mwìmpè, nè Díyì! Mmunyi mùdiku Nyumà Mwìmpè, udi mufunde Bible awu, mwà kuvila cìdiYe mufunde’s?

¹⁴² “Èè, matùkù à bishimà, kaa, kabyèna bitùkèngela aci leelù ewu to. Dyondopa dyà kùdi Nzambi, bintu bikwàbò ebi, byà nè, cintu bu nànkù kacitùkù to. Aci’s ndubùku, mbwena kwamba nè, kaa, lubùku.” Wêwè, mupèlè, mupwekèshiiibwe milongo, mbwalu kaayi ebu neebè’s? Bidi bitùkèngela—bitùkèngela Èvànjeeliyò, piikalàbi nè Nyumà Mwìmpè ùdi munda mwèbè!

¹⁴³ Bu mèmè mwà kukwambila nè: “Mwoyi wà Beethoven wùvwa munda mwànyì,” mvwa mwà kufùnda misambu. Piikala Beethoven musòmbèle munda mwànyì, s’mvwa kwikala nè mwoyi wà Beethoven. Bu nè Shakespeare ùvwa munda mwànyì, mvwa mwà kufùnda tusàlà. Ndi mufwànyìne kufùnda manàyi, bu Shakespeare musòmbèle munda mwànyì.

¹⁴⁴ Nènkù piikalabi nè Yesù Kilistò ùdi nè mwoyi munda mwèbè, byenzedi byàkenzaYe abi, nè Díyì Dyèndè, Yèyè ùdi Díyì, neàDishindikè mu ditùkù edi, ku mulayi mene wàkafilàye. Amen. Ke cìdi Nzambi mwindile ncyòci aci. Ke cìdi cilamè buloba, bwabùlùka, cìdi cilamè buloba pàmwè, cilamè bukwàntèndeelèlu pàmwè, n’Diyì Dyèndè, dilamè kantu nè kantu kàà ku Díyì adi pàmwè. Èyowà’s.

¹⁴⁵ Bantu mbaswè ndongolwelu wa mùshindù awu, nànsha nànkù. Nebàmupetè. Bàkaadimù, ànu patùdi twakulangana apa. Nsangilu wa Maèkèleeziyà wa Buloba bujimà neabàpèeshe ànu cìdibo baswè aci, yònsò wa kùdìbo pàmwè. Mmunyi mùdi beena Mpenta aba mwà kusòmba mu mpungilu eyi, nè kubwela mu Cimenga cyà Vatican nè kufùnda mukàndà wa dyendesha, nè kwamba nè: “Cintu cyà citàmbe kwikala cyà mu nyumà cínkaadiku mwambè, pàndì musòmbè ku luseke lwà Taatù wa Bunsantu Paapà *Kampàndà*,” nè kwikala mwena Mpenta nè kumanya mùshindù. . . Nkwaka mufwè wa cyena Mpenta. Cintu cyònsò mu kaabujimà ncifwè. Ncinyangùke. Bwàci mbujikè’s!

Ncyalukile buludì mu Nsangilu wa Maèkèleeziyà mùtùcì cyà mwômò. Bushùwà menemene.

¹⁴⁶ Kàdi Èkèleeziyà wa Nzambì udi nè mwoyi, Mukàji-musèla awu, ùdi ànu ùtúngunuka ànu bu nè kakwèna bwalu to. Nè Yèyè neàye mu Dyambwibwa, ku Dìyì, ncyà bushùwà, Dìyì nè Dìyì nebitwilanganè. Twètù biikàle citùpà cyà Kilistò, citùpà cyàDì, bikèngela twikalè Dìyì Dyèndè, bwalu Yèyè ùdi Dìyì. Cyà bushùwà. Eyowà's, mukalenge.

¹⁴⁷ Mbabènge Dìyì dilaaba dyà mulayi, dyà cikondo eci, nè Yèyè ùdi misangu yònsò ànu Dìyì. Pùikalàbi nè Nzambì mmutùtùmine kàbìdì Dìyì dilaaba, dilaya, bwà cikondo eci, mu cidimu cyà 1946, Yèyè ùvwa mwà kwikala umwèumwè awu mùvwàYe pàakalwàYe ku cibangidilu apu, Dìyì dilaaba bwà cikondo. Ebèlù 13.8 ùdi ùkwalujilacì buludì pambidi, wàmba nè: “Yèyè ùdi umwèumwè awu makèèlèlè, leelù, too nè kashidi.” Ncyà bushùwà menemene. Nèku twètù. . . Nè Yèyè ùvwa mwà kushàala nè Dìyì dilaya dyà Taatù bwà cikondo eci. Bu Yesù mwà kulwa, Yèyè ùvwa mwà kwikala menemene ànu cìvwà Dìyì dyambè nè ke Cìvwà mwà kwikalakù mu eci cikondo.

¹⁴⁸ Ke cìvwà Eliyà mu cikondo cyèndè. Ke cìvwà Mòsà mu cikondo cyèndè. Ke cìvwà Noà mu cikondo cyèndè ncyòci. Aci's ke cìvwàku, myaba yònsò, cyàkalwà mupròfetà yònsò ùkààdikù mulwè ewu. Nèku Dìyì adi—adi, pàakalwàDi mu kaabujimà, Dìyì dyònsò mu kaabujimà divwijilbwe mubidi munkaci mwètù, Dyàkenza ànu menemene cyàkambaDi nè Dìvwa mwà kwenza mu cikondo aci.

¹⁴⁹ Bu Dyòdi mwà kulwa leelù ewu, Yèyè's mmufwànyine kwikala ànu menemene Yesù Kilistò mwikàle nè mwoyi ku mulayi Wèndè wà cyàkalayàYe bwà kwenza aci, ànu mùdì Dìyì amu.

¹⁵⁰ Yèyè ùvwa Dìyì. Yeshàayi 9.6 n'Yesù Kilistò. Kàdi pàakavwijilbwaDi mubidi nè kusòmba munkaci mwètù, Dyàkenza ànu menemene cyàkenzaDi aci. Mòsà wàkamba mwaba awu, mu Mukàndà wà Ekèsòdè nè: “Mukalenge Nzambì webè,” anyi mu Dutèlònòmà nè: “Mukalenge Nzambì webè neàjuulè mupròfetà, mufwanàngàne naanyi; nèku nebyenzekè nè, ewu yònsò wabènga kuMutèeleja awu, neumushiibwè munkaci mwà—mwà cisàmbà.” Nèku pàakalwàYe, Wàkenza ànu menemene cìvwà Dìyì dyambè nè Neènzè aci. Kàdi kusanganabò cilèma kùdiYe, bwalu ndongolwelu yàbò yìvwa miDìkòsòlòle nè mivwijè Dìyì dyà Nzambì kadiyi nè bwenzeji kùdibo nànsha. Nwamònu anyi? Kabàvwa mwà kwitabuuja bintu bu Nànku to. Kabàvwa mwà kwitabuuja bintu byà mùshindù awu to, bwalu dîbà dikaavwa dipite, mwàkadyàmbidilàbo. Kaa!

¹⁵¹ Bwalu, Yèyè mmujaadike nè Dìyì Dyèndè didi cintu cìmwècìmwè. Yèyè's mmufwànyine kushindika Dìyì leelù

ewu, mùvwàYe muDìshindike musangu awu amu. Yéyè's mmufwànyine kupiisha, bikolè menemene, ndongolwelu yònsò wa cyena-màngumba wa pa buloba, bu Yéyè mwà kulwa pa buloba leelù ewu. Ke cyàkenzàYe ncyôci aci, dyàmbedi. Ke cintu civwàYe mwà kutuuta ncyôci aci. Ke aci menemene cyàkatuutàYe pàakalwàYe dyàmbedi. Ànu mwàkenzàYe musangu awu, ke mwikalàbo mwà kwenza bwà cikondo eci, kàbìdì. Nè Yéyè wàkacyènza musangu awu, bwalu Yéyè kàtu ùshintululakù Dìyì Dyèndè to. Yéyè kàtu ùshintululakù ndongolwelu Wendè to. Cìdì misangu yònsò ànu cìmwècìmwè aci, Cìdì n'Dìyì dilaaba musangu wònsò, bwà cikondo. Ncyà bushùwà.

¹⁵² Pa nàнку kàbìdì, patùdì tucìsangana leelù ewu apa, bu Yéyè mwà kulwa, ndongamu Yèndè bwà kulama buloba pàmwè mmifwànyine kubèngiibwa ànu mwàkadìbi musangu awu.

¹⁵³ Kàdì tèelejàayi, bwà kujikija, ndi muswè kwamba nùнку. Kì mbatùlayè ndongolwelu kampàndà, kì mbatùlayè dngumba kampàndà, dngumba kampàndà dyà ditàmbìdìle, ndongamu kampàndà wa mutàmbìdìle wa mùshindù kampàndà to. Kàdì mbatùlayè Bukalenge, Bukalenge bwà Cyendèlèlè. Amen. Ke cìdì citùlaya ncyôci aci, biikàle nè Mwoyi wà Cyendèlèlè mu Bukalenge bwà Cyendèlèlè ebu. Nè Bukalenge mbukòntonona kùdì Mfùmù wa Cyendèlèlè, Dìyì Dyèndè dyà Cyendèlèlè difidìibwe kùdì cisàmbà Cyèndè cìdì nè Mwoyi wà Cyendèlèlè adi. Nè bantu bàà Mwoyi wà Cyendèlèlè kabèèna bàcyònkomokela pa bintu byà pa buloba to, kàdì bààkafùnda, nè: “Muntu neikalè nè mwoyi ku Dìyì dyònsò didì dipàtukà mukana mwà Nzambi.” Pa nàнку patùdì twètù bònsò mpindyewu. . . Tudi tupeta Bukalenge ebu, nè tujandula nè: “Dyulu nè buloba byònsò bibìdì nebijimine, kàdì Dìyì edi kadyàkujiminakù to.” Nè Dìyì edi m'Bukalenge. Eci m'Mfùmù nè Bukalenge, Ndongolwelu, Mwoyi, katùpà nè katùpà kwònsò kàdì ànu munda *Emu*.

¹⁵⁴ Bu Nzambi mwà kulumbulwishila bàà pa buloba Bèndè ku èkèleeziyà kampàndà, nku èkèleeziyà kaayi kwàbàlumbulwishilàYe? Yìdikù bùngì kaayi? Nkàmà nè nkàmà nè nkàmà yà èkèleeziyà mishiilèshiiàngàne yà cyena màngumba. Piikalà beena Kàtòlikè babìngè, nKàtòlikè kaayi? Piikalà Kàtòlikè kàà cyèna Ngelikà kabìngè, dìbà adi kàà cyena Loomò nkapiile. Piikalà kàà cyena Loomò kabìngè, kàà cyena Ngelikà nkapiile. Pa nàнку, nudi numòna's, piikalàbi nè ba-Méthodistes mbabìngè, ba-Baptistes mbapiile. Piikalàbi nè ba-Baptistes mbabìngè, beena—beena Mpenta's mbapiile. Piikalà beena Mpenta babìngè, dìbà adi ba-Presbytériens mbapiile. Nwamònu anyi? Pa nàнку's nudi bafwànyine kupeta cibwejàkàjì cyà menemene.

¹⁵⁵ Kàdì Nzambi kì mmutùshìye katùyì bujaadiki anyi ci—ci—cipiminu cìdì cikèngela bwà twètù kwimanyinapù to. S'n'Dìyì

edi! Yéyè kwamba nè: “Díyì dyà muntu yònsò ìikalè mashimi, kàdì Dyànyì ìikalè Bulelèlà.” Ncyà bushùwà.

¹⁵⁶ Bwalu: “Maulu nè buloba byònsò bibìdì nebijimine.” MbatwámBILE kaaba aka, nè: “Tudi twakidila Bukalenge bùdì kabùyì mwà kunyungishiibwa to.” Èyowà’s, mukalenge. Pààdìshinda makalenge ónsò à pa buloba aa mpindyewu, nè buloba bujimà munkaci mwà kudishinda, kàdì twètù tudi babàtìjìibwe mu Bukalenge bùdì kabùyì mwà kunyungishiibwa nànsha. Amen. Tudi twakidila Bukalenge kampàndà. Pa nàнку, pàdì buloba bùpanduluka, tudi balediibwe mu Bukalenge ebu bùdì kabùyì mwà kupanduluka to. N’Díyì dyà Cyendèlèlè dyà Nzambì, nè tudi twimanyina pa cyòci aci. Kadyèna mwà kudishindakù to.

¹⁵⁷ Tudi tutàmba kuumvwa bikolè bwalu bwà ndongolwelu mupyamùpyà ewu wíkala mwà kutwàla, ndongolwelu wa ntèndeleele, nudi bamanyè’s, neàtwalè ditalala pa buloba, pàdì beena Kàtòlikè nè beena Mishònyì bònsò badisangishe pàmwè. Bàmwè bàà kùdìbo bàtu bìitabuuja dyondopa dyà kùdì Nzambì, bàmwè kabàyì bìitabuuja to, nè bàmwè bìitabuuja *cikampàndà*, nè bakwàbò bìitabuuja *cikansanga*. Nènku bikèngela nùlekelè dikòkangana dyènú dinùdì munkaci mwà kukòkangana dībà dyònsò, diitabuuja dyènú dyà butangadiki adi, bwà kubwela mu Nsangilu wa Buloba bujimà. Kàdì’s nebièngela bwà òngumba nè òngumba dyònsò dībwelèmu. Pa nàнку, pìikalà òngumba dyediibwe mulawu, nè bwà kushàala wa mu dyòdì, cidi cyèenza cinyì? Cidi cikwàluja paanyimà. Loomò yéyè mwikàle mamwèndè wa òngumba, nè yéyè ke nyama wa lwonji nè cimanyinu cyà nyama wa lwonji, dībà adi kumwenzelabò cimfwànyì, nsangilu, maèkèleeziyà ónsò pàmwè àdì ènza cimfwànyì cyà nyama wa lwonji, ke kwalukila buludì ku cimanyinu cyà nyama wa lwonji kàbìdì! Ndongolwelu wa buloba, cyena màngumba, mmupàtùle ndongolwelu bwà kutwàla cimanyinu cyà nyama wa lwonji.

¹⁵⁸ Nènku’s nudi nucimòna ànu mùndì ncimòna amu, bwà nè mpindyewu mene ncyènzejiibwè ku bukolè, bwà nè, bònsò bàdì kabàyìmu bamana kutèeka mu bulongame abu, màshinyì manène masòmbemù; byamù bilamakaja bidikù bindile bwà Sàtaanà kubwelamu, nè bukolè bwendeshi abu. Nwamònu anyì? Nènku, pàdìbì byènzeka nàнку, muntu nànsha umwe kèna mwà kuyiisha Èvànjeeliyò to, muntu nànsha umwe, yéyè kàyì wa mu ndongolwelu ewu to. Ke cimanyinu cyà nyama wa lwonji ncyòci aci. Nènku vùlukàayi nè, pa dībà adi, Mukàjì-musèla ùkaadi muyè, pa nàнку’s nudi numòna mùdìbì pabwìpì’s. Èyo, pa nàнку nudi numòna mwaba wutùdì’s.

¹⁵⁹ Nudi mwà kumòna nè ncinyì’s: dibùnga dinène dyà tulù edi, bintu bìdì munkaci mwà kwenzekamù ebi. “Kaa, tàbulukàayi, nwènu bansantu bàà Mukalenge, bwà cinyì kubùnga tulù pàdì ndekeelu wènda ùseemena apa?” Nudi ncyèenza bwà cinyì?

Míngà misangu nudi nusàka ditùkù dyènù dyà ngàsà kule neenù ku mpèkaatù. Kanwènjikù nànkù to. Èyowà's, mukalenge.

¹⁶⁰ Mpindyewu, ndongolwelu ewu kàadyàkutwàlakù ditalala pa buloba to. Bu cyòci mwà kutwàla ditalala pa buloba, cyàkenzekelà Mfùmù wa Ditalala uvwa Dìyì awu ncinyi? Mmufwilakanyi nè Kilistò mu dilongesha dyèndè. Bidi bibèngangana ànu menemene nè cidi Nzambi útwa nyama ku mikòlò, cidiYe mutwàmbile. “Bimanyinu ebi nebibifile aba bàdi bìtabuuja,” bàdi bèèla meeji nè aci ndukutukutu. Byenzedi 2.38 ncikwàbò cintu, bwàbò bóbò, kí mbamanyè kantu nànsha kàmwè pa bwalu abu to. Dìyì dyònsò, nè bikwàbò, kí mbamanyè kantu nànsha kàmwè pa Cyòci aci to, nè bàdi bàDivila. Cidi cyùja ànu menemene cyàkambà mupròfètà mu Timòtè Mwibìdi, nshapità mwi3 nè: “Nebìikalè nè mutù mukolè, badibàndishi, biikàlè nè cimwènekèlu cyà difwàna dyà Nzambi, kàdi bafwànyine kuvila Bukolè bwàdi, mu matùkù à ndekeelu.”

¹⁶¹ Ndongolwelu wa cyena màngumba awu ke cimanyinu cyà nyama wa lwonji. Nutu bamanye's. Nwènù kanùyìku kacya banguumvwe ncyàmba kumpàlàmpala, ke bwà cinyi ndi mucituute bikolè be. Bwalu mpindyewu ndi ngèèla meeji nè cikondo cikaadi pabwìpì nè kujika, pa nànkù's mbipicìibwe nè mèmè kucipàtula nè kwamba Bulelèlè pa bwalu bwàci. S'ki yèyè awu. Ke cimanyinu cyà nyama wa lwonji ncyòci aci, menemene. Loomò's nguwva nyama wa lwonji awu, nè yèyè úvwa òngumba, bulongolodi bwà nzànzànzà.

¹⁶² Nènku tudi bapàtùke munda mwèndè, twètù beena Mpenta, bwà katwikadi baabanyanganyi bàà byòbì abi to; kàdi kwalukila buludi: “ànu mùdi mbwa ku bilùshì byèndè, nè ngulube ku bitoci byèndè,” kwalukilamù buludi. Kabyèna bikèmesha to pàdi ndongolwelu wetù wa beena Mpenta mushiikile, nènku ke mùdi wa ba-Méthodistes, ba-Baptistes, Nsangilu wa Maèkèleeziyà wa Buloba bujimà, nè bònsò! Bàdi munkaci mwà kuminyiibwa mu Nsangilu wa Maèkèleeziyà, benza cimanyinu anyi—anyi cimfwànyì cyà nyama wa lwonji, bwà kumupèesha bukolè bwèndè. “Nènku úvwa nè mutù mutàpa mpùtà wa lufù, kàdi pashìishe mwikàle nè mwoyi,” Loomò wa cimpàngaanù uya ku Loomò wa ciipaapà. Kaa, ekèlekèle, mùshindù mwinè úvwa beena Mishònyì mpofo's wè! Kàdi's ki nwènù aba, mpindyewu mene basòmbe ànu munkaci mwàci mene. Nè kakwèna cintu nànsha cimwè cinùdiku mwà kwenza mpindyewu to. Ndongolwelu ùkaadi mumanè kwenjiibwa. Nebàcyàngàtè kàdi kabàyi bamanyè nè mbacyàngàtè to. Nebìikalè ànumù, kwàjikì. Kabèèna mwà kupàtukamù to. Cikaadi cimana kwenza.

¹⁶³ Kí ncyenyi kùdi bantu to, nànsha nànkù. Nciyiishìibwe. Vùlukàayi nè, Nzambi wàkafila bujaadiki bwàci, kubùshindika ku Dìyì Dyèndè. Bintu byàkambàYe nè Neènzè abi, Wàkabyènza ànu menemene. Pa nànkù, kakwèna pàà kumbingila to. Èyowà.

bantu, katwàkutàngilakù nànsha ku aci to. To, mukalenge. Bu mutùdì dîbà adi babàtîjîibwe mu Bukalenge ebu, tudi mpindyewu basòmbe mu myaba yà mu Dyulu mu Kilistò Yesù, kaa, ekèlekèle, nè Mfùmù wetù mwela maanyì pàmwè neetù; tucyònkomokela pa Diyì Dyèndè dilaya dyà Bukalenge, dilaaba nè dishindikîibwe munkaci mwètù mene. Amen. Yoyòyò! Ki bwalu mbwòbù abu's, mulayi Wèndè wà Bukalenge muvwîjîibwe mulèlèla kumpàlà kwètù mene, cintu nànsha cimwè kaciyèna mwà kuKuumushakù to. To, mukalenge.

¹⁷¹ Abraham, nànsha mwàkadì mukàjèndè mukùlàkàjì amu, nè yèyè wènda ùkùlakaja dîbà dyònsò, kabyàkamutàcishakù nànsha kakesè to. Yèyè kàakatènkakanakù ku mulayi wà Nzambì, ku bupidyà to. Nànsha wèwè wamba nè: “Kabyèna mwà kwenzekakù to. Kèna nè kwàyàye naaci to,” yèyè wàkashààla naaDì, nànsha bìshi. Bwà cinyi? Mfùmù ùvwa nendè, ùmuleeja bikèènà-kumòna nè ùmuleeja cìvwà mwà kwenzeka, nènkù byàkenzeka ànu mwàkambàYè amu, nè yèyè kumanya nè ùvwa n'Nzambì.

¹⁷² Nènkù pàdì Nzambì ùfla mulayi nè wèwè muwùmòne, nè Yèyè ùcyàmbe nè cyènzeka, nè ùcyàmbe nè cyènzeka, nè wàmbe, cyènzeka, nè kaciyikù cìpangila, n'Nzambì bwà ditùkù adi. Kaa, kucyònkomokela pa milayi yà mu Dyulu yà Diyì Dyèndè dilaya bwà cikondo eci, kaa, bamanyè, nè ditwishibwa dyà kakùyì mpatà to dyà diitabuuja nè, kùdì kùlwa mauulu mapyamàpyà nè buloba bupyabùpyà. Amen. “Dyulu dipyadìpyà nè buloba bupyabùpyà, bwalu dyulu dyà kumpàlà edi nè buloba bwà dyàmbedi nebujiminè.” Kàdì mu dyulu dipyadìpyà edi nè buloba bupyabùpyà, Pòlò mmwàmbè kaaba aka mu Mukàndà wà Ebèlù, makùmì àbìdì nè- . . . 14.25 nè: yèyè wàkamba nè: “Bwalu tudi twakidila Bukalenge bùdì kabùyì mwà kunyungishibwa nànsha.” Tudi babwelèmu munyi? Kì nku ndongolwelu wa ntèndeleele to; kàdì, Bukalenge bwà Nzambì bùdì munda mwèbè. Bukalenge's! Mfùmù nè Diyì Dyèndè bìdì cintu cimwè, nè Didì munda mwèbè, munkaci mwà kushindika dîbà ditùdì nè mwoyi mpindyewu edi. Mulayi wàkafilà Nzambì bwà cikondo eci awu, s'ki twètù aba, basòmbe nè Mfùmù, basòmbe mu myaba yà mu Dyulu, tuMutàngila wènzà bintu ebi.

¹⁷³ Kàdì mmunyi mutùdìku mwà kukoma nyimà ku Diyì adi, kuya ku ndongolwelu kampàndà's? Cìdì cyènzà cinyi? Cìdì cìvila Diyì. Bikèngela wítabe, ùbenge Bulelèlà kumpàlà kwà wèwè kwitaba cilèma. Ncyà bushùwà menemene. Nudi nwitabuuja nànkù anyi? [Disangisha dìdì dyàmbe nè: “Amen.”—Muf.]

¹⁷⁴ Dîbà ditùdì nè mwoyi edi, Éyì Nzambì wa yààyà, buloba bùdì munkaci mwà kudishinda's! Nkulembeleja mu bitanda mwàmwa, mabombè, nkulembeleja cintu cyà kwenza ànu naaci menemene muntwamu.

¹⁷⁵ Èkèleeziyà ùkaadi mudìlongòlòle. Mmutwibwe cìtampi

munda, mudilongòlòle bwà kulwa. Nekwikalè dipòngoloka dinène dyà Nyumà, èyowà's, mukalenge, bwà kwambula Èkèleeziyà awu nè kuMubweja mu maulu. Menemene's. Bwalu, nwamònu's, Èkèleeziyà, Dìyì, Mukàjì-musèla. . . Nènku, Kilistò, mudimu Wèndè wà bwambi wùdi mu Mukàj'Èndè-musèla, ùdi mwikàle Mubidi Wèndè, Mubidi wà mu dyulu, anyi ndi njinga kwamba nè, Mubidi Wèndè wà—wà mutàmbe-mfùkilu awu mwaba ewu pa mubidi wà nyumà pa buloba, Nyumà Wèndè ùdi munda amu munkaci mwà kupàtula Mwoyi Wèndè patòòke, too nè pàdi Yèyè nè Èkèleeziyà bàlwa umwe mu dibàkà. Nwamònu's, bàdi bàlwa umwe. Ùdi ùbàngata, ànu banyààbanyà bakesè mu matùkù à ndekeelu.

¹⁷⁶ Nè pashiishe bavirgò bònsò bàvwà balààle tulù abu, munda mwà bikondo, bàakabiika bònsò ku lufù, nudi numòna's. Mpindyewu, aci mmu cilù cyà mwandamutekète, cikondo cyà mwandamutekète cyà èkèleeziyà, cikondo cyà ndekeelu, cyà nshùikidilu, Laòdikiyà, ku ndekeelu, pàakabwelamù ànu kasumbù kààbò kakesè. Kàdi, cidi citwàla dibiiikà dyònsò dyà ku lufù dyà bònsò bàakafwà mu bikondo byàbò abu, biikàle nè mwoyi ku Dìyì divwà dilongolola kùdi Nzambì nè diyiishibwe bwà kwenzeka mu ditùkù adi, bu mutùdi bayiile bikondo byà èkèleeziyà abi nè bamòne ànu menemene Dìyì divwà mwà kutwilangana naabò mu cikondo aci; mwàkajuukà Luther, mutùdi tujandula, mu cikondo cyà Luther, kupàtukakù nyama wenzè bu mpàla wa muntu, nè kupàtukakù, ewu uvwa “mwakajuludi,” mbwena kwamba nè *muntu*. Nènku, pàdibi nè, bikondo byònsò, cyònsò cìvwa cìkùmbanangana ànu menemene nè mishìngà yà Dìyì dyà Nzambì.

¹⁷⁷ Nènku ki mwàkumbananganabi ànu menemene nè cimanyinu nè bwalu bwà kukèma nè cintu cidi Nzambì mulayè bwà kwenza mu matùkù à ndekeelu aa. Nè Èkèleeziyà Yèyè mwinè neikalè mudilongòlòle nè neàye mu Dyambwibwa nè Yesù, bwalu: “Tudi twakidila Bukalenge bùdi kabùyi mwà kunyungishiibwa to. Kabwèna mwà kunyungishiibwakù to. Maulu nè buloba nebìjiminè, kàdi Bukalenge ebu kabwàdyàkujiminakù to.” Amen. Ndi nè disànkà dyà kwikala, dilòòlò edi, amen, dilòòlò edi, mu Bukalenge abu. Kanwènaayikù nè disànkà dyà kwikalaMù anyi? [Disangisha didi dyàmba nè: “Amen.”—Muf.] Kaa, ekèlekèle, bwà kwikala mu Bukalenge, Aci's!

¹⁷⁸ Elàngànà ànu meeji's, ncinyi cyùdiku mwà kudìlaya leelù ewu? Mu bidimu bikwàbò dikumi too nè ku dikumi nè bitaanu, bu buloba mwà kwimana, bu byòbì mwà kutwàla nànkù, muntu yònsò mu Shreveport, mukàjì yònsò, nebikukèngèlè bwà wèwè kwambula cingoma, mu mùsèèsù, pàmwè neebè, mu mpaaya mwèbè, bwà kudikùba wèwè mwinè. Bàngòndàvi's! Mmunyi muwàcìmanyikà? Cìtètètebi's. Èè, cyònsò nkòòng. . .

¹⁷⁹ Mwà nsanganyiibwa mu New York, lumingu lukwàbò alu.

Ki mèmè kupweka kuntwaku, mu ntàntà wa kilòmèètà, kakùvwa cintu cikwàbò to ànu bangòndàvì bàà bitende aba biikàlè nè tukànu ku macì, nè nsuki milamika, balwàte tundamata, nè bàna bàà bakàji balwàte tuubìkini tukèsè, mùdìbo bàcibìikila, babilwàte mùshindù awu, bapàtùke mu mùsèèsù. Nè bantu bònsò bàdi nè cyà kubàpèèsha bukenji bwà kupita. Kaa, mbwalu kaayi ebu nè ditùnga edi's wè? Mbwalu cidi—ncimanyinu cyà ditùnga dyà nsòmbelu wa kanyawù, dibèngiibwe kùdi Nzambi. Ke cyònsò cidiku.

¹⁸⁰ Mmunyi munùdi mwà kwibakila pa makàlà à bimanu byupùke mùshindù awu? Mmunyi munwàcyenzà, pàdi bangòndàvì munkaci mwà kwendakana mu mùsèèsù nè kwashila Mfùmù wa ditùnga mene ku cingoma ànu mu kàshinyi kèndè amu?

¹⁸¹ Nènkù dilòòlò dikwàbò, muntu kampàndà wa ku nzùbu wa dilààdikilamù màshinyi, mubànde kuntwaku bwà bwimvi nè bikwàbò, kubwelaye ànu buludì nè kutùpikila kumpàlà kwà bampùlushi bàà mu Texas nè bantu bapite pa lukàmà nè byà mu njila biimàne mwaba awu, kubwelayemu; nè bantu bònsò bamutàngile, kupàtula cingoma cyèndè nè kwasayè muntu kampàndà mu dishebeyanga dyà cikisu, kàdi kupàtuka kuya. Yèyè's neadibingishè nè “mmupàle,” nè kumulekelabò.

¹⁸² Ànu mu cimenga cyètù, muntu kampàndà kuditwayè mu cilongolwedi cyà màshinyi kampàndà, dikwàbò adi, mu kasùmbù kakesè kàà baakwidi bàà beena mudimu, nè kwangata mu—mu—muntu kampàndà ùvwa musùmbishidyanganyi wa màshinyi. Yèyè kàvwa mumuswè to, ke kutùùlayè ànu cingoma nè kumwasa, misangu yinaayi anyi yitaanu. Kàdi kwambayè mùvwàye mupàle; kumulekelabò yèyè kuya. Cyòci ciikale “dipaala” dìdìbo bamwakwile naadi, dìbà adi Oswald pèndè ùvwa nè mpùngà, s'bviva bikèngela kupetayè mpùngà wa kumwakwilabò nè ùvwa mupàle.

¹⁸³ Ncinyi ciine aci, nànsha nànkù? Nudi numòna kùdìci's, cintu cyònsò mu kaabujimà mmusùmbà munène wà dinyanguka! Cintu cyònsò mu kaabujimà ncipiile, nè buloba bujimà mbwimàne bupiile, nè èkèleeziyà mmwimàne mupiile kumpàlà kwà Nzambi. Amen. Kabyèna bikèmesha to patùdi munkaci mwà kupanduluka!

Tùsambilàayi.

¹⁸⁴ Mukalenge Nzambi, ke twètù aba. Dìbà dyàkùmbanyi, Taatù. Dìbà didi mwà kwikala dimanè kuya kupita mutùdi twètù twela meeji. Pàmwàpa dinyanguka nditàmbe kudyàdijamù, nè mukùmbi wà yelèkè mmudyè, nè mukùmbi wà hazilà, mu mùshindù wà nè Mwoyi wònsò wùkaadi muyè. Ndi nKulòmba, Mukalenge, bwà kwikala nè luse. Enzàku, Mukalenge, nè kwòkò mulùme anyi mukàji, mwànà wa balùme anyi wa bakàji, mu Bwikadi mpindyewu, udi kàyi muKumanyè to, bwà

ndekeelu cyà mudimu wònsò wà bwambi cyàkayiisha bajìmine Cyendèlèlè. Nènku nekwikale mudimu wà bwambi mpindyewu wikalà mwà kuyiisha bajìmine Cyendèlèlè paanyimà pàà bóbò bamanè kubenga kuWàkidila.

¹⁹¹ Kàdi kwòkò kùcidi ànu kùmwèka bu nè kùdi kantòlantòla mu mwoyi wèbè, mu mùshindù wà nè udi muswè kwikala nè Kilistò munda mwèbè amu, nè buloba bujimà bufwè, udikù mwà kwela cyanza cyèbè muulu, kwamba nè: “Wamvùlukakù mu disambila, Mwanèètù Branham.” Mukalenge ànùbènèshè. Èyowà, èyowà, byanza dikùmi anyi dikùmi nè bitaanu. Nkufwànyinekù kwikala mukwàbò kumpàlà kwà twètù kusambila anyi? Mpindyewu tukàadi pabwipi nè kujikija, mu tusunsa tutwè ku túbìdì anyi túsàtù. Nzambi àkubènèshè, wèwè nsongàakàjì.

¹⁹² Anji elàngànàayi ànu meeji pa bwalu abu, elàayiibi meeji pa bwalu abu, ambàbi tǔng bu díbà mwà kwikala dimanè kupita? Ambàbi tǔng bu wèwè mwikàle muntu wa ndekeelu wikalàYè mwà kukookola ku ciibi?

¹⁹³ Bùdi munkaci mwà kudishinda, aci tudi bamanyè. Kwèna mwà kushààla apa to, aci’s ncintu cyà bushùwà. Kwèna mwà kushààla apa to. Neùye. Cifunde wèwè ànu cyanààna, neùye. Nènku pawikalà . . .

¹⁹⁴ Kwikadi ànu musalùke to. Kwambi nè: “Ndi wa mu èkèleeziyà to.” Ikalà mutwishùbwe bwà Cyòci aci. Kilistò Yèye kàyi musòmbèle munda mwèbè, munda mwèbè, too nè paùdi . . . meeji èbè ònsò, mwoyi, musùùkà, mubidi.

¹⁹⁵ Wèwè, udi wamba nè: “Èè, mémè’s ndi ngèèla meeji nè . . .” Kwèna nè meeji àdi nè mushing to, mwanèètù. Meeji àwà mu mwò Kilistò awu ikalè munda mwènù! “Ndi ngèèla meeji nè matùkù kaàvwa nè cyà kwikala . . . Ndi ngèèla meeji nè kabìvwa bikèngela bwà *cikampàndà* kwikalaci nànkù to. Ndi ngèèla meeji nè Dìyi kadyèna diswa kwamba *cikampàndà* to.” Katwèna nè meeji àdi nè mushinga to.

¹⁹⁶ Pùikalà meeji à Kilistò munda mwètù, díbà adi netùjingululè nè Dìyi adi m’Bulelèlè, nè Dyòdi didi nè mwoyi ànu munda mwètù mene. Kwèna mwà kupanga kucyènza to, Didi n’Kilistò!

¹⁹⁷ Pàtulà mwoyi mu mwonji wà cibimbi nè uwùtèèkè mu mwonji wà diwòji, newùkwamè bibimbi. Kwèna mwà kuwùpangisha kucyènza to, bwalu’s ke mwoyi wùdì munda amu.

¹⁹⁸ Kàdi wèwè—kàdi wèwè wamba nè: “Èè, mémè ncyèna ngùtabuuja Aci to, Dìyi edi—edi,” díbà adi aci kī n’Nyumà wa Kilistò to. Nwamònu’s, kùdi nyumà mukwàbò kampàndà munda mwèbè amu.

¹⁹⁹ Kùdikù mukwàbò kumpàlà kwà twètù kusambila anyi? Nzambi àkubènèshè. Nzambi àkubènèshè, nè wèwè, wèwè.

Èyowà, abi's mbîmpè. Mpindyewu, muntu mukwàbò, katanci kakesè cyanààna mpindyewu. Nzambì àkubènèshè, wèwè nsongàalùmè. Wèwè, inàbànzà mutekete. Wèwè, mwanèètù wa bakàji. Nzambì àkubènèshè, nè wèwè. Èyo, kùdikù mukwàbò anyi? Nzambì àkubènèshè, lwà paanyimà pààpa.

²⁰⁰ Mpindyewu kùcìinyi to. Kùùmvu bundù mpindyewu to. Mààlabà dilòòlò díbà ndifwànyine kwikala dimanè kupìta bikolè. Nwamònu anyi? Mbifwànyine kwikala dilòòlò edi diikala mwoyi awu mwà kwimanyika dituuta. Mbifwànyine kwikala nè dilòòlò edi ùMubèngè, musangu wèbè wà ndekeelu.

²⁰¹ Mbanganyi mwab'ewu bàdì kabàyi nè dibàtiiza dyà Nyumà Mwîmpè, elàayi byanza muulu, udi mumanyè nè—nè kwèna Nendè to anyi? Ekèlekèlè! Ke mùshindù wùdì ubwela ngwòwò awu. Nyumà Mwîmpè n'Kilistò. Mùshindù awu ke wùdì mutwìbwe citampì mu Bukalenge, Efèsò 4.30: “Kanùbungamiji Nyumà Mwîmpè wa Nzambì to, unùdì batwìbwe nendè citampì too nè ku ditùkù dyà bupikudi bwènù.” Nènku wèwè—nènku wèwè nè meeji à Bible ewu, bwà nè Kí mmulelèlè to, díbà adi nyumà udi munda mwèbè kí n'Kilistò to, bwalu Kilistò udi Díyi.

²⁰² Ke Bukalenge bùdì kabùyì mwà kunyungishiibwa mbwòbù abu's, ke Díyi adi. Ke Bukalenge bùdì kabùyì mwà kunyungishiibwakù to. “Maulu nè buloba nebìjiminè, kàdì Díyi Dyànyì kadyàkujiminakù to.” Díyi dyòdì munda mwènù! “Nwènù bashààle munda Mwànyì, nè Díyi Dyànyì munda mwènù; nùlombè cinùdì baswè, nebànwènzèlèci. Byenzedi bìndì Mémè ngèza,” Yone Munsantu 12.14, “byenzedi bìNdi ngèza, nenùbyènzè pèènu; byàbùngì mene bipite ebi, bwalu Ndi nya ku Taatù. Mu katanci kakesè emu, bàà pa buloba kabaàkuMmòna kàbìdì to; kàdì nwènù nenùMmòne, bwalu Nèngìikalè neenù, munda mwènù mene, too nè ku ndekeelu kwà buloba.”

²⁰³ Tàngilàayi numòne civwà byenzedi Byèndè, numòne ní mbitwalùkidilè mu matùkù à ndekeelu. MbaCibènga anyi? Buloba bujimà! Nè buloba bùdì munkacì mwà kudìshìnda cyàkàbìdì, mu Noèl ewu, ànu mwàkadibi ku Noèl awu.

²⁰⁴ Taatù wetù wa mu Dyulu, kùdì byanza byàbùngì byela muulu kaaba aka dilòòlò edi, pàmwàpa makùmi àsàtù anyi makùmi ànaayi, mu kasùmbù kakesè kàà bantu aka, byela muulu dilòòlò edi, nè bàvwa bamanyè nè kabàvwa ànu mwaba wùvwà wùkèngelà kwikalabò to. Bàvwa bamanyè nè Wèwè kùvwà musòmbe munda mwàbò to, mu Cipiminu. Bàmwè, pàmwàpa cintu kampàndà mu Bible, bàdì bàmba nè: “Ndi ànu. . . Ndi—ndi—ndi nCìitaba bwalu ndi—ndi ànu ngèèla meeji nè pàmwàpa bìvwa bikèngela mémè kwenza nànkù.”

²⁰⁵ Kàdì, Mukalenge, Wèwè wàkalaya nè Wèwè newìkalè Díyi, nè Wèwè udi Díyi. “Nènku Nèndwe kunùdì, nè kuDimanyisha kunùdì.” Tudi tusangana nè ndongolwelu Yèbè, ndongolwelu Webè, kàtu ùshintulukakù to.

206 Paùdi ubwela mu Dipungila Dikùlukulu, Wèwè wákamba nè: “Dìyì divwa dilwa kùdi bapròfetà.” Nènku pààkenzàDi nàнку, bààkamba cipròfetà nè Kwenzekaci, bwalu Cìvwa n’Nzambi.

207 Mpindyewu tudi tusangana nè paWàkatùtùmà, nè kutùtùma nè mudimu bwà kuya mu buloba bujimà nè kuvwija bayiidi, nè Wèwè wákamba nè: “Pàdi Yèyè Nyumà Mwimpè ùlwa pambidi pèèbè, Yèyè neàtwalè bintu bìNdi munùlongèshe ebi, ku civùlukilu cyènù.” Mbwena kwamba nè, cyàkàbidi’s! “Nè neànùleejè maalu àcilwalwà.” Cyàkàbidi’s! “Nzambi, mu bikondo byà kale nè mu mshindù mishiùlèshùlàngàne wàkaakwila nè baataatù ku bapròfetà; mu matùkù à ndekeelu aa ku Mwàn’Èndè, Kilstò Yesù.” Nyumà Mwimpè Yèyè mwìnè, ùlwa, Mubuludi wa Dìyì difùnda, nè Muleeji wa bintu bicilwalwà’s! Mbambè nè: “Dìyì dyà Nzambi,” mu Ebèlù 4, “nditwè kutàmba mwelè wà mvità wà mutwisha nseke yibidi, Dijinguludi dyà meeji àdi mu mwoyi.”

208 Nènku muntu mubiipe nè wa mu èkèleeziyà, leelù ewu, ùdi mwà kusòmba nè kuKumòna wenza cintu cimwècimwè aci, kàdi kuCibiikila nè nnyumà *mubi*, ànu mwàkenzàbo mu matùkù à kale amu. “Piikalàbo bàbiikila Mfùmù wa nzùbu nè ‘Beelèzèbùlà,’” kàdi’s tudi tucimòna.

209 Mukalenge Nzambi, ncinyi cikwàbò citùdiku mwà kwenza mpindyewu? Kùdi myoyi yidi nè nzala mwab’ewu yidi myelè byanza byàyi muulu. Yangàtekù ànu mpindyewu, Mukalenge, ùjàku mwoyi wònsò nè dinanga Dyèbè. Enzàku nàнку.

210 Nènku patùcidi nè mitù yetù miinyika apa, bu nwènù bàdi beelè byanza muulu abu mwà kuswà bwà kuseemena pabwipi nè cibumbà cyà ku cyambilu eku, kanù—kanùcilààdikijikù to, nwamònu’s, ànu bwà mutanci wùdi wùlonda mpindyewu ewu, juukilaayi ànu kuulu, nè lùkàsà lwònsò, nè lwàyi kùnweku, imànaayi ànu kuulu. Edi ndifwànyine kwikala dilòlò dinùdi nupeta Nyumà Mwimpè.

211 Balundà bàanyi, tàngilàayi, eci kacyakutùngunukakù dîbà dyònsò to. Cidi, necijikè. Cidi mukaci mwà kujika mpindyewu mene, nè cidi mwà kwikala cimana kujikija. Kàdi paùdi ànu uteeta bwà kujinga kufika kùdi Kilstò, dîbà adi’s kùcidi ànu cintu kampàndà mwaba awu, kàbidi, ciikàle cikukòka mùshindù awu.

212 Kwènakù mwà kulwa mpindyewu nè kwimana ànu kaaba aka bwà disambila anyi? Nwènù bàdi bàjinga nàнку awu abu, nudi mwà kulwa buludi kunyùngulukila ku cyoshelu eku, ànu bwà katanci kakesè, patùcidi nè mitù yetù miinyika apa. Mpindyewu bantu bàdi munkaci mwà kulwa kumpàlà eku. Ncyà bushùwà, bàndaayi buludi kumpàlà eku ku nyùngulukilu wa cyoshelu eku. Wèwè udi wamba nè: “Buloba bùdi munkaci mwà kudishinda, mèmè ncyèna muswè maalu à buloba munda

mwànyì to. Ndi muswè Bukalenge munda mwànyì, bùdì kabùyì mwà kudishindaku to.”

213 Yesù wàkamba nè: “Kakwèna cintu nànsha cìmwè cyàjìmina to. Mèmè nèncìjuulè cyàkàbìdì ku matùkù à ndekeelu. Èyowà, Nèncìjuulè.” Yèyè mmulayè, nànkù kanwèna mwà kudishinda to. Nzambì neàcìjuulè. Nànsha ciikàlè cinyì, Yèyè neàcìjuulè.

214 Nuvwakù bamanyè nè kakwèna cintu nànsha cìmwè cìdì mwà kubutudiibwa kùdì muntu anyì? Cintu nànsha cìmwè kaciyèna mwà kubutudiibwa to. Wèwè udi wamba nè: “Kàdì udi wamba bìshi bwà kapyà, pàdìkù kwòsha cintu kampàndà apu?” Kakèèna kàcibùtula to. Cìdì ànu ntupwishipwishi atu muntwamu tùdì túsùsulula mishindà ayi, nènku wèwè kupeta luuya lwàcì alu. Cìdì cyàlukila buludì ku ngiikàdìlù wacì wa ku cibangidilu, mùshindù wùvwàcì ku cibangidilu awu; àsiidè, gâzè, makènkè, nè bikwàbò, ànu mùvwàbì amu. Kwèna mwà kubùtula cintu nànsha cìmwè to. Bu—bu buloba mwà kunèngà ntàntà mukùmbàne, ncifwànyìne kwalukila buludì ku katùpà kakwàbò kàà dibèji, anyì mucì mukwàbò, anyì cyònsò cyùdì wosha aci. Nwamònu’s, kwèna mwà kucibùtula to. Nzambì ngudi mucyènzè nànkù.

215 Kaa, kwèna mwà kubùtula bufùkì bwà Nzambì to, ncyà bushùwà menemene, pa nànkù ambààyaaku tǔng mùdìYe mwà kutàmba kubiisha cìdìYe mulayè’s!

216 Kwèna muswè kulwa anyì? Nèkwikalè bakwàbò kàbìdì mpindyewu anyì? Kùdì kasùmbu kakesè mwab’ewu, kabàyì cyàbìbìdì cyà bàvwà beelè byanza muulu to. Mvwa ndyàmbidila nè nuvwa nwambidilamù panùvwà beelè byanza byènu muulu apu, nangàngà pa Mukenji bu nànkù.

217 Mbanganyì bàà kunùdì mwaba ewu, mpindyewu nè mitù yènu miinyika, bàdì bamanyè eci nè, nudi bamòne Nzambì mukwàte ku mulayi Wèndè, pa cibùmbà cyà ku cyambilu apa mene, nè mumanye maalu masokòme à mu mwoyi? Wùmwè, musangu nànsha wùmwè Yèyè kàtukù mwanji kwamba cintu nànsha cìmwè cìdì kaciyì cyezèke to. Nudi bamanyè nè aci ncilelèlè. Mu masangisha, myaba yònsò, ànu menemene cyàkenzà Yesù Kilistò pàvwàYe pa buloba apa, Yèyè mmucyènzè kàbìdì. Aci’s nudi bamanyè. Nudi bacimanyè. Mvwa ngèèla meeji ku dyondopiibwa Dyèndè.

218 Kùkaadi mbingu yìbìdì, kumpàlà kwà mèmè kuya ku New York, kùvwa inàbànzà kampàndà wàkalwa nè kànsèrè pa mumìnu. Nyumà Mwìmpè kwakula nendè, mu disangisha amu. Úvwa mwab’ewu kuntu kwàka, dyàlumingu, mwikàlè nè kànsèrè kajìngila mu lubondya, ùvwa mukàkòsòle kamatè. Bangàngàbukà kukàtàngila, nè kwamba nè: “Mwoyi kupàtukawù mu kànsèrè, nènku kudilekelakù.” Kàdì yèyè kukàkòsòla kumatakù.

219 Mukwàbò ùvwa nè kànsère mu tujilu twà bukàji. Nènku ùvwa naakù mwaba awu, mwikale nè fòtò mwalabàle, nè díyì dyà ngàngàbukà difùndapù. Kàvwa kamulòpòke paanyimà pàà matùkù àbìdi.

220 Muntu mukese mwimàne mwaba awu, uvwa kàyì nè civùlukilu to, munda mwà—munda mwà ngondo nè ngondo nè ngondo. Ùvwa mudishinde nè kabonkoshi kàmusaama. Kàvwa mene mudimanyè anyi nè mpenyi pàvwaye ùsanganyiibwa to. Ànu nè mwàkù wà disambila, nè kumutentekela byanza, Mémè nè: “Dyèbè nganyì?”

Yèyè nè: “Billy Dukes.”

Mémè nè: “Wèwè udi nè bidimu bìngà?”

Yèyè nè: “Bidimu citèemà.” Yèyè nè: “Ndi penyi?”

221 Bukolè bwà Nzambì's! Mvw'a kujinga bwà nwìkalakù naanyì mu Colorado, kùkaadi ndambù wa mbingu, pààkenzeka cintu kampàndà civwà mwà kukunyùkusha, bwà kumanya nè civwa ncinyì. Tukàadi ku cikondo cyà nshìikidilu, mulundà wanyì.

Kanwìkadi, kanùlàadikiji eci ntàntà mule to. Lwàyì. Kwòkò kwikàle mukwàbò mwab'ewu, lwàkù. Nudikù mwà kuswà anyi? Nudikù mwà kulwa anyi?

222 Mpindyewu, wèwè kùyì ulwa to, wamònu's, ncyèna—ncyèna mwà kucyèna to, ndi—ndi—ndi—ndi... Cyònsò cìndi mwà kwenza cidi ànu kunwàmbila Bulelèlà cyanààna, nwamònu's, díbà adi bwalu mbulààlè kùdi. Ànu bu Noà, wàkabwela, bwátu kumukàngila munda, cintu nànsha cìmwè kacýàkenzekakù to bwà katanci kakesè; kàdi bàà pa buloba bààkabùtuka pambèlu apu, nè bàà pa buloba bààkatùngunuka ànu nè kwikala nè mwoyi mùshindù wùm wèwè wùm wèwè awu. Nwamònu anyi?

223 Pilaatù wàkatùngunuka buludì, paanyimà pàà yèyè mumanè kupoopela Yesù pa nkùrusè. Nènyiishè pa cyòci aci, mu ndambù wa malòòlò, “mashi pa byanza byèbè,” bu Mukalenge mwà kwanyisha.

Mònaayi mpindyewu, kùdikù mukwàbò, kumpàlà kwà twètù kujikija anyi?

224 Mpindyewu nèndombèku bakàji nè balùme bàdi badilàmbùle menemene, bàdi bamanyè Nzambì, bwà kulwàbò kwimana mwab'ewu nè kutentekela bantu aba byanza. Eci ncifwànyine kwikala musangu wà ndekeelu wìkalàbo mwà kupeta mpungà ewu. Bàmwè bàà ku nwènù bantu badilàmbùle bàdi bamanyè Nzambì abu, lwàyì nè nwìmanè nè bantu aba. Bàdi nè twartà tukùnzùbile pambidi, pàmwè nè muntu yònsò wa kùdibo, mbwena kwamba nè bàdi, mbeenyi munkaci mwènù. Ngèèla meeji nè aci ncyà bushùwà. Lwàyì, nubàtentèkèlè byanza. Bàmwè bàà ku bidimba byà mu Life Tabernacle, bàlwe mwab'ewu. Bàmwè bàà kùnùdi nwènù bàna bèètù bàdi

mwab'ewu aba nudi baswè kulwa anyi? Lwàyi, ke dībà ndyòdi edi. Kanwènaayikù—kanwènaayikù banangè eci anyi, nwènù cisàmbà? Ekèlekèlè! Lukunukunu lwètù lùdi penyì's? Cintu kampàndà cidi citùsàka aci cyèpi? Mbwalu kaayi ebu's?

Mpindyewu bu batèèleji mwà kwindilakù katancì kakesè cyanàànà, bwà disambila edi.

²²⁵ Nwènù bàdi biimàne mwab'ewu aba, mpindyewu tàngilàayi, kanwèyemenyi disaluka kampàndà to, nànsha mùdìbi nè dìdi nè disaluka mu Cyòci aci. Kanwèyemenyi pa nè nudi nwakula mu myakulu, anyi to. Kanwèdikù meeji ku bwalu nànsha bùmwe to. Nzambì neàtangilè bwalu abu, nwamònu's. Wèwè lòmba bwà Yesù Kilistò àbwelè mu mwoyi wèbè nè àsombelè Yéyè mwinè munda mwèbè. Kùcyèna kàbìdì muswè meeji èbè wèwè mwinè to. Udi muswè meeji Èndè Yéyè. "Meeji àvwà mu Kilistò awu ikalè munda mwènù." Kaa, eci cidi . . .

²²⁶ Eci, èè, newìkalè ànu mwà kuumvwa bintu ebi bwà musangu wà ndekeelu, musangu kampànda. Mpindyewu tàngilàayi, ndi muswè bwà batèèleji bònsò bàjuukilè kuulu, kunùdi aku. Mpindyewu, nwènù bananga bàdi balwè kaaba aka bwà dibàtiiza dyà Nyumà Mwimpè aba, mààlabà ngwa Disàkidila, kakwèna byà dikwàta mudimu mààlabà to. Eci mbwà musùukà wèbè, mwanèètù wa balùme, mwanèètù wa bakàji. Eci ke kwèbè kùyaaya kwà Cyendèlèlèlè. Eci, cidi anyi mpindyewu anyi kashidi. Nènku paùdi ànu umvwa dikòkiibwa dikesè dimwèpelè adi! Kàdi anji elàayibi meeji ku Malelèlè aa, Ngòwò aa àsanganyiibwa ànu kumpàlà kwètù mene. Kanwikadi bafwè pa bintu abi to, balùmyànà wa yààya. Ncilelèlè. Ncijaadikiibwe, cilelèlè, cipwàngàne, musangu wònsò. Nènku n'Díyi, dishìndikiibwe's!

²²⁷ Ndi ntàngila muntu kampàndà mwimàne ànu kaaba aka. Ncyèna mwà kuvùluka dìnà dyèndè to. Ngèèla meeji nè m'Blair, Révérend Blair. Pàmvwà nsanganyiibwa ku Hot Springs kwàka, ànu àbìdi àdi panshi aa, mèmè kubàkula mwaba awu mu batèèleji amu, muntu uvwa musòmbe mwaba awu awu, nè nyumà mubi ùvwa ùteeta kufika kùdi muntu awu, bwà kumufikisha ku dingeela mpatà. Mpindyewu tàngilàayi nùmonè cyàkenzekà. Mèmè nè: "Udi mufwànyine kwikala naanyi dijinga musangu kampàndà, wamònu's." Kwakenza ànu mbingu mikesè cyanàànà mukàjèndè kumbiikilàye, muntu awu ùvwa ùpunga nè lufù. Nwamònu anyi?

²²⁸ Ke muntu awu kwitabayè, kumanyayè dībà adi nè ùvwa ndyabùlù ùteeta bwà kumufikisha ku diitabuujja nè Cìvwa ndiyelè dyà mùshindù kampàndà anyi cintu kampàndà. "Kàdi mmunyi mùdiye mufwànyine kumanya aci's?" mwàkadyàmbidilàye. Ke dībà adi yèyè. . . Ku disambila twètù kwipata bubì mu yèyè.

229 Nè pashiishe kùkaadi ndambù wa mbingu, nwamònu's, Sàtaanà ùvwa mumanyè nè cikondo aci cìvwa munkaci mwà kulwa, mùvwàye mwà kwikala mulààle mwaba awu nè cyùjà mu lubadi lwèndè, ngèèla meeji mmwàkamba mukàjèndè, anyi cintu kampàndà, mwikàle nè mubidi kapyà wèbè wà ngwengwengwe, lungènyì lumujimine mu mutù; kàyì mumanyè nè cìvwàku ncinyi to, twìshì kampàndà mu lubadi, tumùje lubadi lwàmba kutaayika. Ke mukàjèndè mukesè awu kumbùikilayè ku Tucson. Mémè nè: "Mwanèètù wa bakàji, udikù nè mùshwàlà anyi?" Ngèèla meeji nè ùvwa nè cintu kampàndà kuntwaku, cìtambalà cikesè anyi cintu kampàndà. Mémè nè: "Ndi—ndi mwà kucimòna. Angàta cintu eci ùcìtentèkèlè Mwanèètù Blair, mu Dìnà dyà Mukalenge Yesù." Kàdi's wàkadi mumulòmbe bwà kulwa kubìikila.

230 Ambàbi tǔng bu Sàtaanà mwà kwikala mutuutè dyàkalenga nè mumufikishe ku dibenga kwitabuujà, pèndè mumanyè nè aci cìvwakù? Kàvwa mufwànyìne kwikala mwimàne kaaba aka dilòòlò edi nè Bible wèndè pa mwoyi wèndè to. Nwamònu anyi?


231 Sàtaanà ngudi uteeta kukufikisha ku dibenga kwitabuujà Eci. Ncyà bushùwà. Kùcìtèèlejìkù to. Vùlukàayi nè: "Yesù Kilistò ùdi umweumwe awu makèèlèlè, leelù, too nè kashidi." Nwamònu's, bintu ebi mbijaadikiibwe nànkù.

232 Mpindyewu twànjàayi ànu bònsò, nwènu bàdi ku cyoshelu eku aba, twèlàayi ànu byanza muulu cyanààna, kàdi twàmbè nè: "Mukalenge Yesù, nkwàcishèku ànu mpindyewu mene," muntu nè muntu ùsambila.

233 Taatù wetù wa mu Dyulu, tudi badisangishe kaaba aka, Éyì Nzambi, cidi pankaci pàa lufù nè mwoyi, bwà bantu bàdi biimàne kaaba aka aba. Nyumà Mwímpè àbwelè mu mwoyi wàbò mpindyewu mene. Swàkù bwà Bukolè bwà Nzambi búlwe, bùdi bubàfikishe too nè ku cyoshelu eku abu, swàkù bwà Búlwe kùdìbo mu dibìikà dyà ku lufù dyà Kilistò, nè bwàbàpakù Mwoyi munène wa Cyendèlèlèlè wùdìbo munkaci mwà kukeba awu. Mukalenge, maaèkèleeziyà myaba yònsò àdi munkaci mwà kufwà, màyi à nyumà mmamwèke bu nè mmuumbùshìibwe pa buloba. Nènkù pàdikù mpungà bwà bantu aba kulwàbò mwínshì mwà Mpokolo apa, enzàku, Mukalenge, bwà misùukà yàbò yìdì myumìnyine, dilòòlò edi ayi, yìdì nè nzala nè nyòòtà yà Nzambi ayi, swàkù bwà yùjiibwè nè Nyumà Mwímpè mpindyewu mene. Enzàku nànkù, Mukalenge. Luse Lwèbè nè ngàsà bìikalèku pambidi pààbò.

234 Mpindyewu lamàayi ànu—ànu mutù wènu. . . tǔngunukàayi nè kusambila, tǔngunukàayi ànu nè kusambila. Bantu bònsò, nwamònu's, tǔngunukàayi ànu nè kusambila. Ndi nnùsambidila. Nèngènzè cyònsò cìndì pàanyi mwà kwenza aci, kàdi ncyèna mwà kunùpèesha Nyumà Mwímpè to. Bikèngela Nzambi àcyènzè. Tàngilàayi, difwànyikijile Kilistò ànu kumpàlà kwèbè

aku, mu meeji èbè amu. Tàngilà kwàka ùmonè ní udi umòna Kilistò kumpàlà kwèbè, paùdi ubwita kwisù apu. Dìbà adi nda buludì kudiYe, wǎmbè nè: “Mukalenge Yesù, ke mèmè ewu. Wèwè nè mèmè netwikalè umwe, kubangila ànu mpindyewu ewu. Nêngàngatè Dìyì dyònsò dyúdi Wèwè mungambile dilòòlò edi adi.” Mpindyewu shààlaayi ànu mwaba awu, tũngunukàayi ànu nè kushààla, nwênù bashààle dilòòlò edi, mààlabà, ditùkù didì dilondà, shààlaayi ànu too nè pààjikàku, nulòmba, biikàle nwitabuujà nè Nzambì neàkuuje nè dibàtiiza dyà Nyumà Mwímpè.

²³⁵ Lwâkù apa, Don, bàlombòle mu disambila. Nzambì àkubènèshè, Don. 

63-1127 Buloba Bùdi Kàbìdì Munkaci Mwà Kudishinda
Life Tabernacle
Shreveport, Louisiane États-Unis

CILUBA

©2026 VGR, ALL RIGHTS RESERVED

VOICE OF GOD RECORDINGS
P.O. BOX 950, JEFFERSONVILLE, INDIANA 47131 U.S.A.
www.branham.org

Dîyî dya bwena-cintu

Makenji ônsò tudi badilaminyine. Mukanda ewu udi mwa kutuuciibwa pa mabeji ne cyamu cya kwebe kumbelu bwa mudimu webe wêwê anyi bwa kupeeshangana, kabiya bya mfranga to, bu cintu cya kutangalaja naaci Evanjeeliyo wa Yesu Kilsto. Mukanda ewu kawenaku mwa kusumbishiibwa, kuvudijjiibwa bya bipitepite, kwediibwa mu cibànzà cya lùntàndalà, kulamiibwa mu cikàlwilà, kukudimunyiibwa mu myakulu mikwabo, anyi kulombesha naawu mpetu kakuyi mukanda wa cishimbi-dîyi wa dikwanyishila mukufundila kudi Voice Of God Recordings® nansha.

Bwa kumanya maalu makwabo anyi kupeta bîngà bintu bitudi naabi, anyisha webeje:

VOICE OF GOD RECORDINGS

P.O. BOX 950, JEFFERSONVILLE, INDIANA 47131 U.S.A.

www.branham.org